

## **Faasologa o Mataupu Vasega Feololo 2022.**

### **MANATU AOAQ: E I AI LE ATUA I SOO SE MEA**

#### MANATU TA'IALA O IANUARI & FEPUARI: O FAAILOGA VAAIA O LE ATUA

##### IANUARI:

30 O fea tatou te maua ai le Atua? Teuteronomie 31:7-8

##### FEPUARI:

06 O le poloaiga sili a le Atua Mataio 28:18-20

13 Aiseā e lē vaaia ai le Atua? Esoto 33:18-22

20 So'otaga o le tagata ma le Atua Ioane 15:1-8

27 Ia avea i tatou ma ta'ita'i lelei 1 Peteru 5:1-11

#### MANATU TA'IALA O MATI: O LE ATUA O LE ALOFA LAVA IA

##### MATI:

6 Ia alofa i soo se tagata Mareko 5:35-44

13 Aua le ola tauimasui Roma 12:17-20

20 Ia loto fesoasoani i e mafatia Teuteronomie 15:7-10

27 O tulafono faa-Auro Mataio 7:9-12

#### MANATU TA'IALA O APERILA: O LE ATUA FAAMAGALO AGASALA

##### APERILA:

3 Ia loto faamagalo Neemia 9:16-18

10 O le malaga faatupu (Laupama) Luka 19:37-40

17 Ua toetu Iesu (Toetu) Luka 24:1-12

24 Tumau i le Alii Iakopo 1:12-15

#### MANATU TA'IALA O ME: O LE ATUA E PAIA MA MAMALU

##### ME:

1 Ua faaalua le mamalu ma le silisili ese o le Alii  
Luka 7:11-17

8 O Iokapeta le tinā lototele  
(Aso Sa Tinā) Esoto 2:1-10

15 (Aso Sa Fonotele)

22 Talanoaga i le vaieli Ioane 4:19-26

29 Agalelei atu e faasaoina ai Iosua 2:1-19

MANATU TA'IALA O IUNI: O LE ATUA O LE OLA

IUNI:

5	O le Aso Penetekoso	Galuega 2:1-4
12	Alofa i e agaleaga mai	2 Tupu 6:8-23
19	E faaaogaina e le Atua soo se tagata	Galuega 10:1-8
26	E lē feagai se faatagata ma le mamalu o le atua.	1 Samuelu 5:1-5

MANATU TA'IALA O IULAI: O LE PULE AOA O A LE ATUA.

IULAI:

03	E leai se mea e faigata i le Atua.	Kenese 18:8-19
10	Ua faaososoina Iesu i le meaai.	Mataio 4:1-4
17	Aua le manatu faapito	1 Samuel 30:21-25
24	O le foa'i ua fai mo Iesu.	Ioane 12:1-8
31	Ua lavea'i e Mose le fanau teine a le ositaulaga Mitiana	Esoto 2:11-19

MANATU TA'IALA O AOKUSO: O LE ATUA AUAI

AOKUSO:

07	Aua le mana'o tele	1 Tupu 21:1-16
14	O le pepelo o Anania ma Safaira.	Galuega 5:1-11
21	O le mauoa ma le tagata mativa	Luka 16:19-25
28	Ua usita'i Saulo i lona tamā	1 Samuelu 9:1-5

MANATU TA'IALA MO SETEMA: O LE ATUA FAI TAULAGA

SETEMA

04	Ia fai mea sili.	Kenese 4:1-7
11	O le atamai o Iesu	Mareko 6:1-13
18	E leaga le ola faamaualuga.	Tanielu 4:28-33
25	Malaga faatasi ma Iesu	Mataio 14:22-27

MANATU TA'IALA MO OKETOPA: O LE ATUA  
AGALELEI

OKETOPA

23	Ua faamagalo e Esau lona uso o iakopo.	Kenese 33: 1-5
30	Ua faamalolo le tagata pipili.	Galuega 3:1-10

MANATU TA'IALA MO NOVEMA: O LE ATUA FAI  
VAVEGA

NOVEMA

06	Ua toe tu mai lasalo	Ioane 11: 40-45
13	E silisiliese le paia o le atua	Esoto 3:1-6
20	Ua sauni e aperaamo le taulaga.	Kenese 22:6-13
27	Ua vavao e iesu le matagi	Mareko 4:35-41

MANATU TA'IALA MO TESEMA:

O IESU O LE TUPU

TESEMA

- 04 Ua faaali le agelu ia sakaria
- 11 Ua fanau iesu i le fale o manu

Luka 1:18-25

Luka 2:1-7

**MANATU AOAQ: E I AILE ATUA I SOO SE MEA.**

**MANATU TAIALA: IANUARI & FEPUARI: O FAAILOGA VAAIA O LE ATUA.**

O lo o manino lava i le Tusi Paia atoa ai ma aoaoga faa-mataupu silisili a le tatou Ekalesia, e le mafai ona tatou vaaia le Atua, aua o le Atua o le Agaga lava ia. (God is Spirit). Peitai e tele lava ma anoanoai faailoga tatou te iloa ai le Atua. E le gata i le tele o mea o lana foafoaga Paia, e pei o le siosiomaga, sami, o le laueleele, o manu, o laau, ma le vanimonimo, ae faapena foi i le la, o le masina ma fetu. Ae le gata i lena, ua tatou malamalama foi, o i tatou, na faia i tatou i le faatusa Paia o le Atua. O lona finagalo, ia tatou foliga ia te ia i la le tino mafaufau aemaise i le Agaga.

**ASO SA: 30 IANUARI 2022. (ASO SA TUPULAGA)**

**MATAUPU: O FEA TATOU TE MAUA AI LE ATUA?**

**SINI:** Ia malamalama le vasega o lo o tatou faatasi pea ma le Atua i aso uma ma taimi uma o le tatou ola.

**TUSI FAITAU:** Teuteronomie 31:7-13.

**FESOASOANI MO FAIAOGA:**

O le Tusi o Teuteronomie o se toe faamanatu i le nuu o Isaraelu o vavega ma faailoga na faia e le Atua mo i latou ina ia saga faamalosi ai pea lo latou ola faatuatua i le Atua ma ia latou usiusitai i ona ala, ma mulimuli i ana polaiaga, ao sauni atu i latou e ulufale atu i le nuu o Kanana.

O le vaega o le Tusi sa tatou faitauina o upu apoapoai a Mose ia Iosua atoa ai ma le nuu o le Atua ina ua sauni atu i latou e ulufale i le nuu

na folafolaina e le Atua e fai mo latou tofi. Ua tautino e Mose ia Iosua o ia lava lea ua filifilia e le Atua e fai ma ona sui, na te taitaia le nuu i Kanana, ona ua le finagalo le Atua e oo Mose i Kanana.

O le faamanatu la a Mose ia Iosua ao i ai faatasi ma le nuu o le Atua, ia faamalolosi pea ma loto tetele, auā e mautinoa lava latou te malaga faatasi ma auai faatasi le Atua ma i latou i la latou malaga. E i ai pea o ia ma savavali faatasi ma i latou. E le tuulafoaina e le Atua i latou i le taimi o la latou malaga o lo o faamoemoe mo le nuu o Kanana.

(O lo o latou malaga foi ma le atolaau a le Atua e muamua i o latou luma. O le atolaau o le Feagaiga o lo o i ai papa maa o tulafono a le Atua.) O tulafono e ao ona faailoa i tupulaga fai a'e o le nuu i taimi o tausamiga o fale apitaga ina ia teufatu i loto o i latou uma, ina ia o latou ola ai ma savavali ai. O le faailoga o lo latou ola ma le malosia e maua mai le Atua, e le gata i le tino ae sili i le Agaga.

E faapena foi i tatou, e i ai pea le Atua ma'i tatou i taimi ma aso uma o lo tatou ola. Peitai e ao lava ona tatou usiusitai i lana Upu poo ana Afioa ua tuuina mai ina ia tatou savavali tonu ai, aua o le Atua lava e fesoasoani mai ia i tatou i mea uma tatou te manatu i ai. O le mea lea ia tatou fiafia ai pea ma toaaga mai i le aoga Aso Sa ma le lotu ma soo se mea fai a le Ekalesia, aua e fiafia foi le Atua e auai faatasi ma i tatou i taimi uma. O ia na te tausia ma puipuia i tatou mai le tele o faalavelave ma puapuaga o le ola e ono afaina ai i tatou.

**UIGA O UPU:**

tofitofia -	vaevaeina, faasoaso, tufatufa.
atolaau o le feagaiga -	ato o lo o i ai i totonu papa-maa o
tulafono e 10 a le Atua	
tausaga o le faasaolotoga -	tausaga e faamagalalo uma ai aitalafu a
tagata sa fai i isi tagata.	
tausamiga o fale apitaga -	sauniga o le faamanatuina ai le o'ese
	mai o Isaraelu mai Aikupito.

matata'u -  
anaana -

ava ma usitai, faaaloalo, faaetete.  
faalogo ma fai, usitai.

**GALUEGA FAATINO:** TALIGĀ FESILI.

(1) O ai lea na suitulaga ia Mose na te taitaiina le malaga i Kanana?

Tali = O Iosua

(2) O a nisi o faamantu taua na ta'u e Mose ia Iosua ma le nuu?

Tali = Ia faamalosi ma loto tele auā e faatasi pea le Atua ma i latou i la latou malaga.

(3) O le a le fuaiupu o lo o taua ai le auai faatasi o le Atua ia Iosua ma lana taitaiga o le nuu?

Tali = fuaiupu e 8

(4) O a ni auala tatou te faia e mautinoa ai e faatasi pea le Atua mai tatou?

Tali = Ia tatou usiusitai i Afioga Paia ma tausisi i poloaiga a le Atua. Alofa i soo se tagata.

**PESE:** Iesu taitai oe, Pese ma viiga 199

**AOAOGA:**

1. E i ai pea le Atua faatasi mai tatou i taimi uma.
  2. Ia avea Iesu e fai ma taitai i lo tatou ola.
  3. O le ola mata'u i le Atua tatou te manuia ai.
- .....

**ASO SA:** 6 FEPUARI, 2022.

**MATAUPU:** O LE POLOAIGA A IESU.

**SINI:** Ia malamalama le vasega, ia fiafia e faalogo ma tausisi i poloaiga mai le Alii.

**TUSI FAITAU:** Mataio 28: 16 – 20

**FESOASOANI MO FAIAOGA:**

Tamaiti, o 5a iina te iloa le uiga o le upu, poloaiga? Ioe, o se faatonuga po o se feau ua tuuina mai, ia pe ua poloaiina ai foi tatou e ao ona tatou faaatinoina.

Ioe, e tele ma anoanoai feau eseese i totonu o o tatou aiga atoa ai ma faatonuga a o tatou matua, faatasi ai ma o tatou faiaoga e fai mai pea ia i tatou i le tele o aso, ae peitai, o le poloaiga lea e pei ona sa tatou faitau i ai, o se poloaiga taua tele lea aua o le poloaiga mai lo tatou Alii o Iesu, ao le i afio o Ia i le lagi.

O le poloaiga a Iesu i ona soo, ina ia latou o atu e fai nuu uma lava ma soo. Ia papatiso atu i latou i le Suafa o le Tama, Le Atalii, ma le Agaga Paia. Ia a'oa'o atu ia te'i latou, ia tausisi i mea uma e pei ona ia a'oa'o atu ai ia te'i latou. Faauta foi e i ai pea o Ia faatasi ma'i latou se'ia oo i le gataaga o le lalolagi. O le tasi lea o poloaiga sili ma le taua a lo tatou Alii ua Ia fetalai ai i ona soo ina ia o latou o e faataunuu. Ae o le mea ua mautinoa tamaiti, o tatou foi o isi so'o, auā o lea ua tatou filifilia Iesu e fai ma Alii ma faaola i o tatou olaga. E ui la ina le mafai ona tatou papatisoina tagata, ae e i ai a le taimi e avea ai nisi o'i tatou ma faifeau, pe a oo ina matutua i tatou, ona mafai lea ona tatou faia lea vaega. Peitai o le tatou faia ma le usitaia o le finagalo o le Atua, e i ai i lo tatou faalogo, usiusitai, loto alofa, loto fesoasoani, loto faamagalalo, ma faatupu le filemu, o le faailoga lava lea o lo tatou usitaia o ana poloaiga.

Manatua ua fetalai Iesu e i ai pea o Ia mai tatou i taimi uma seia oo i le gataaga o le lalolagi. O Ia na te tausia ma laveaiina i tatou ma faamanuia i tatou i soo se mea tatou te fia maua ai se fesoasoani, e ala i lo tatou ola suesue, sailiili, galulue, ma tatalo pea i le Atua i soo se mea tatou te manaomia i aso uma e le aunoa.

**UIGA O UPU:**

masalosalo - le talitonu, le mautonu, le iloa tonu 6a ii'o pe sese.  
Papatiso - faatinoga o le sauniga Paia mo le faa-paiaina ia avea ma tagata o le Aiga Paia o le Atua.  
gataaga - mutaaga, i'uga.

**GALUEGA FAATINO:**

Faatino le faataitaiga o le galuega a le faifeau, galuega faa-matua, faapea le galuega faa-faiaoga e pei ona masani ai. Ia vaevae le vasega i vaega se tolu, ia tofua le vaega ma le faatinoga, e atagia ai le faatinoga o poloaiga.

**PESE:** Faalogo ma usita'i.

**AOAOGA:**

1. Ia usitai i poloaiga a le Alii e manuia ai.
2. Ia 6a ii tatou ma faataitaiga i nisi i ala o le Alii.
3. Taulamua i le fai meatonu ma le amiolelei.

.....

**ASO SA: 13 FEPUARI, 2022.**

**MATAUPU: AISEA E LE VAAIA AI LE ATUA?**

**SINI:** Ia malamalama le vasega, o le mamalu matautia ma le Paia silisiliese o le Atua, e mafua ai ona lē mafai ona vaaia e se tasi.

**TUSI FAITAU:** Esoto 33:18-22

**FESOASOANI MO FAIAOGA:**

O Mose o se taitai iloga na filifilia faapitoa e le Atua e alu e ave'ese mai lona nuu mai Aikupito, o le nuu sa o latou nofo pologa ai. O Mose foi, sa mafai ona fetalai tuu sa'o i ai le Atua e tusa ma lona finagalo aua lo latou o'ese ma Aikupito, ma le taitaiga o le nuu o le Atua agai i le nuu na folafolaina e fai mo latou tofi. Ai lava foi o le tasi lea o mafuaaga na fia vaai ai Mose i le Atua. Peitai o lo o manino mai lava i Afioaga Paia a le Atua e pei ona ia fetalai ai ia Mose, e matua le mafai lava e se tasi ona vaai i le Atua ma ola pea o ia, e pei ona taua i le fuaiupu e 20. Peitai sa finagalo lava le Atua sei faailoa i a Mose lona matautia silisiliese e pei ona taua i le fuaiupu e 22. Faimai na ufiufina e le Atua i lona alofi lima mata o Mose, seia mavae ese o Ia, ona ia iloa mai lea o lona tua, ao ona fofoga e le mafai ona vaaia e se tasi. O le faailoga o le matautia o le Paia ma le mamalu silisiliese e le mafaia e o tatou mata faa le tagata ona vaaia. Peitai o le afio mai o Iesu, sa fetalai ai o Ia, o se ua vaai mai ia te au, ua vaai o ia i le Tamā.(.....)

O se faamanatu taua foi lea moi tatou uma. O le vaai ai o Mose i le fuli mai o le tua o le Alii, o le faailoga lea e iloa ai o le Atua e ta'imua, ao i tatou, e ao ona o tatou mulimulitai i ala o le Atua, ua ia faailoa mai ia i tatou, tatou te savavali ma mulimuli ai. E le mafai le mafai e lo tatou faatauvaavaa ona vaai tino i le Paia Silisiliese ma le mamalu o le

Atua. Auā e le mafai e o tatou mata ma tino agasala ona fesagai ma le mamalu maualuga ma le Paia matautia o le silisiliese o le Atua. O le Atua foi o le Agaga lava Ia e pei ona iloa ai i lona peresona (Trinity) (God in three perons) Le Atua le Tama, Le Alo, ma le Agaga Paia. Peitai o lona finagalo ia tatou usiusitai ma mulimuli i ona ala uma ona tatou taunuu manuia lea i le nuu ua Ia folafola mai e fai mo tatou tofi. O le ola lava lea e faavavau.

**GALUEGA FAATINO: FAALILIUGA (TRANSLATION)**

Faaliliu mai le faitauga, poo le parakalafa ua tuuina atu i le gagana Samoa.

*And the Lord said, "I will cause all my goodness to pass in front of you, and I will proclaim my name, the Lord, in your presence. I will have mercy on whom I will have mercy, and I will have compassion, on whom I will have compassion. But "He said," "you cannot see my face, for no one may see me and live"*

Faaliliuga o loo maua i le Tusi Paia-Samoa (Samoan translation) o le Faitauga mai le Esoto 33:19-20

**PESE:** E matautia lava Oe!

E mata'utia lava oe x2

Oute ifo ma tapua'i i lalo o ou aao

E mata'utia lava oe

Tali: E matagofie naua lou alofa, filemu, agalelei

Pule aoao le Alii o mea uma

E tonu ma faamaoni oe.

**AOAOGA:**

1. Ia fiafia e savali i ala ua aoao mai i le Afioga Paia a le Atua.
2. Ia tatou iloa e Silisiliese, e Paia ma mamalu le Atua.
3. Usitai i le finagalo o le Atua e manuia ai.

.....

**ASO SA: 20 FEPUARI, 2022**

**MATAUPU: SO'OTAGA O LE TAGATA MA LE ATUA.**

**SINI:** Ia malamalama le vasega, o le tagata e mausali lona so'otaga ma le Atua e manuia lona olaga.

**TUSI FAITAU:** Ioane 15:1-8

**FESOASOANI MO FAIAOGA:**

E tāua tele le sootaga o le tagata ma le Atua, e pei ona ta'ua i le faataoto sa faitauina. O i tonu lea ua ta'u manino mai ai e le Alii o Iesu, o Ia lava o le vine autu poo le vine moni, a'o i tatou o lala o le vine. Le sootaga maumaututu lea o'i tatou ma le Atua e pei ona ta'ua. O le faamoemoe o le Atua mo'i tatou ia tatou fua mai i ni fua lelei ma aoga. O lona finagalo ia foliga i tatou ia te Ia ma avea i tatou ma ona soo.

Ae afai tatou te lē tutumau ma lē mausali lo tatou so'otaga ma le Atua, o lona uiga e leai a se mea lelei ma se faamanuiaga tatou te maua. O Iesu o le vine autu. O Ia e maua mai ai e ona lala o loo pipii mau ia te Ia mea uma e faamoemoe i ai i le ola lelei, ina ia mafai ai ona fua mai lala i ni fua lelei se tele ma le aoga. O le faamoemoe, e le gata ina ia tupu talaulau ma ola lauusi ai le vine ia poo le malo o le Atua, ae ia ola atili mai ai nisi Agaga o matelaina i faiga sauā a le alii o le lalolagi ia poo le tiapolo. O lo tatou tumau i lo tatou va fesootai ma mausali ma le Atua, o se sootaga sili lea, e maua ai e'i tatou uma faamanuiaga e tele e le gata i le tino, mafaufau, aemaise i le Agaga. Ia tatou naunau ia mausali ma mauaa lo tatou sootaga ma le Alii, ona le avea lea oi tatou ma lala e tipieseina ma lafoaina i le afi ma le

malaia, ae ia avea i tatou ma lalā e fua 8a ii fua aoga e tele ua mae'a teuteuina e Ia.

### UIGA O UPU:

lafoaiina - tia'i, lē faaogaina, togi-eseina. Tu'ueseina.

### GALUEGA FAATINO: TALIGA FESILI.

1. O ai le vine a'o ai le lala o loo faataatau i ai le faataoto o loo i le tala o lenei aso?  
*Tali: O Iesu le vine, a'o tatou o lala*
2. O le a se mea e tupu i lala vine pe a lē pipii i le ogalaau o le vine?  
*Tali: E lē mafai ona fua mai i ni fua lelei.*
3. O le a le i'uga o lala e le fua mai i ni fua lelei?  
*Tali: E salaeseina ma lafoa'i i le afi.*
4. Faamata o le a se auala e mafai ai ona fua lelei mai ai lala o le Vine?  
*Tali: Ia lelei le sootaga o lala ma le ogalaau autu o le Vine ia poo Iesu lea.*
5. E faafefea ona faa-lelei le sootaga o lala ma le vine autu?  
*Tali: E faalelei pe afai e pipii mau pea lala i le vine autu, ia fesoasoani i le galuega e manaomia ai e le vine autu, ona mafai ai lea ona fua mai i fua lele.*

**PESE:** Ia tumau ma pipii mau.

### AOAOGA:

1. A tatou tutumau ia Iesu, ona mausali lea o lo tatou sootaga ma Ia.
2. Ia avea i tatou o ni lala vine e fua tele mai i fua e aoga.
3. Faamoemoe i le Agaga o le Alii, tatou te mafai ai mea uma.

**ASO SA:** 27 FEPUARI, 2022.

**MATAUPU:** IA AVEA I TATOU MA TA'ITA'I LELEI.

**SINI:** Ia malamalama le vasega, o le galuega faa ta'ita'i, e tatau ona faia i le faamaoni ma le alofa.

**TUSI FAITAU:** 1 Peteru 5:1-11.

### FESOASOANI MO FAIAOGA:

O le avea ma taitai, e mafai foi ona faatusaina o le avea lava lea o se tasi ma leoleo mamoe lelei aemaise a i totonu o le Ekalesia. E tele lava ina tofia taitai o e ua matutua soifua i totonu o se galuega ia poo se nuu faapea foi i Ekalesia. O i latou tonu lea e tatau ona maua mai ai le tofa sinasina, ia poo faatonuga ma fautuaga lelei ma le taua aua lava le sologa manuia o soo se faamoemoe o soo se faalapotopotoga. E faapea foi se lagona o Peteru ua ia faailoa mai i le Tusi faitau o le tatou mataupu i lenei taeao. O le tusi e ave i toeaia ia poo tamā o le Ekalesia i le vaitau tonu lea na faataapeapeina ai le au kerisiano i nuu eseese o le lalolagi (Diaspora) aemaise i Asia ititi, ona o sauaga mamafa a le malo Roma.

Ta'ua e Peteru, e tatau i ē o le a avea ma taitai ona taualamua i faataitaiga lelei uma, ina ia mulimulitai i ai tagata ua i lalo o la latou taitaiga. Ua faamanatu mai e Peteru ia tausia lelei le lafu mamoe ma le loto maulalo faatasi ai ma le alofa. Ia aua nei faia ma le fia fai oloa, ae ia onosai i mea faigata e tutupu i luga o le galuega. E ao foi ona lagonaina e i latou o e talavou, ona usiusita'i i ta'ita'i ina ia sologa manuia itu uma o le galuega a le Atua.

Ia manatua ia faia le galuega o le taitai poo le leoleo mamoe ia tusa ma le finagalo o le Atua. Ia faamuamua le vaai i le manuia o le lautele o mamoe, ae leo le vaai muamua i le manuia o le taitai. Ia iloa ona fai



ma auauna i mamoe i soo se itu. Ia naunau i mea e avatu i e mafatia, ae le o mea e maua mai mo ia lava ma lona lelei. Ia avea ma faataitaiga lelei i mamoe i mea e lelei ma manuia ai le lautele o le lafu mamoe, ina ia aua nei manuia nisi ae mafatia nisi.

O nisi ia o itu e ao ona maua e i tatou uma pe a oo ina tofia ma avea i tatou ma taitai, poo leoleo mamoe i le lumanai. Ia faia mea uma ia tusa ai ma le finagalo o le Atua. Ia maua e i tatou le alofa, agamalu, fefa'apalepalea'i, felagolagoma'i, faamaoni, atoa ai ma le onosai, ona sologa manuia ai lea o mea uma aemaise a o le galuega a le Atua ina ia maua ai e'i tatou le pale o le ola i le manuia o le ola e faavavau.

**UIGA O UPU:**

aioi - ole, tatalo atu.  
faatauanauina - fai faamalosi. (do it by force).  
faaa'oa'o - fai ma faataitaiga, taulamua. (lead by example)  
mana - (malosiaga faale Agaga) (Spiritual power)

**GALUEGA FAATINO: FETUFAAIGA**

Tuu le avanoa i tamaiti, e faaali mai ai ni o latou manatu poo a uiga o upu ua tuuina atu i lalo.

1=leoleo mamoe, 2= pule faasauā, 3=faautauta, 4= alofa tunoa, 5= faamaualuga.

**PESE:** Ua ou filifili e mulimuli ia Iesu

**AOAOGA:**

1. Ia fai le galuega faa-taitai i le alofa ma le lotomaulalo.
2. O Iesu lo tatou taitai sili.
3. O le leoleo mamoe lelei e ofoina atu lona ola mo ana mamoe.

.....

**MANATU TA'IALA O MATI: O LE ATUA O LE ALOFA LAVA IA.**

O le tasi lea o faalupega o le Atua ua faigofie ona tatou iloa ai le natura o lo tatou Atua o lo o tatou auauna ma tapuai i ai. O le Atua o le alofa lava Ia. Ua tatou molimauina uma lava lea tulaga pe a tatou vaavaai i lana foafoaga mamana, aemaise o lana tausiga i le soifua o tatou tagata i lo tatou ola i aso uma.

O lona alofa e le faapito i se vaega o ni tagata, peitai o le alofa e faasafua mo tagata uma. Ao lona faamoemoe foi lea mo'i tatou uma. Ia tatou iloa ona tatou alolofa atu i isi o tatou uso a tagata, ma ia faapena foi ona tatou iloa ona tatou alolofa i le Alii lo tatou Atua, ma le malosi atoa, manatu atoa, ma o tatou Agaga atoa.

**ASO SA: 6 MATI 2022.**

**MATAUPU: IA ALOFA I SOO SE TAGATA.**

**SINI:** Ia malamalama le vasega, o le alofa i soo se tagata, o le ata manino foi lea o lo tatou alolofa i le Atua.

**TUSI FAITAU:** Mareko 5:35-43.

**FESOASOANI MO FAIAOGA:**

O le faalogo ai o Iesu i le tala i le maliu o le afafine o le alii e pule i le sunako, na ia tuua ai le sunako ae o atu loa ma ona soo o Peteru, Iakopo, ma Ioane i le fale o le alii e pule i le sunako. E taunuu atu Iesu o loo faatumulia le fale i tagata o lo o lauē ma fetagisi ona o le maliu o le teineititi e pei ona ta'uina atu. Sa fetalai atu Iesu ia te'i latou e aua latou te fetagisi, e lei oti le teine ae o loo moe o ia.

Sa le talitonu i latou, peitai na tulia uma e Iesu i latou i fafo ma le fale, ae ua totoa ai na'o le tamā o le teineititi ma lona tinā faatasi ai ma ona

soo sa i ai i totonu o le fale. Ona tago lea o Iesu i le lima o le teineititi ma fai atu lana upu, “Talita kumi” o lona uiga, “Funa e, ou te fai atu ia te oe ia e tulai” Faimai ona tulai ai loa lea o le teineititi i luga ma ua savali o ia. Sa matua’i segia mauli o’i latou uma na i ai, ia pe ua matuai taufai ofo uma i latou ina ua toe faaolaina mai e Iesu le afafine o le alii pule i le sunako na oti. Ae na fetalai atu Iesu ia tei latou, ia aua lava nei o latou faailoaina atu i nisi se tala e uiga i le toe faaolaina mai o le teineititi. Ua faatonu atu foi Iesu ina ia ave ifo se mea e ai i le teineititi. O le faailoga o le alofa moni o lo tatou Alii o Iesu i soo se tagata. E le gata ua ia faaola le tagata ua oti, ae faapena foi ona ia manao e tausia lelei ma fafaga o ia i taumafa.

O se faamanatu foi lea moi tatou le fanau. Ia tatou maua le loto fesoasoani ma alolofa i soo se tagata, e ala lea i le ave i ai ni fesoasoani eseese tatou te maua, e pei o meaai ma soo se mea lava ina ia maua ai e le isi tagata le ola. Ia le gata la i le ola i la le tino, a ia sili ai ona maua e le tagata le ola faa le Agaga ina ua tatou avatu i ai upu o le ola mai Afioga paia a le Atua.

**UIGA O UPU:**

sunako - falesa, fale tatalo.  
talita kumi - funa e, ou te fai atu ia te oe, ia e tulai.  
lauaitu - fetagisi  
segia o latou mauli - ua taufai ofo, tete’i, lē mautonu.

**GALUEGA FAATINO: FAATINOGA.**

Faatino le tala e pei ona aumai ai i le Tusi faitau.

**PESE:** Le alofa o le Atua, e ofoofogia.

**AOAOGA:**

1. Ia e alofa atu i le lua te tuaoi ia pei o oe lava ia te oe.
2. Alofa i le Alii lou Atua ma lou Agaga atoa.
3. Aua le faapito lou alofa i nisi, a ia alofa tutusa i tagata uma.

.....

**ASO SA: 13 MATI, 2022.**

**MATAUPU: AUA LE OLA TAUIMASUI.**

**SINI:** Ia malamalama le vasega, o ai lava e i ai se mea e le fiafia ai i le isi ona uso, ia aua lava nei ola tauimasui a ia alofa pea ma agalelei i ai.

**TUSI FAITAU:** Roma 12 :17-21

**FESOASOANI MO FAIAOGA:**

O le auga lava ia ma le faamoemoe o aoaoga uma a lo tatou Alii o Iesu, o le alofa, ia totonu o o tatou lotu. E faapena se agaga o lo o aumaia e Paulo i le vaega lea o lana tusi sa tatou faitauina mo le tatou mataupu i lenei taeao. Ua faamanatu e Paulo i le au kerisiano i Roma o se tasi lea aafiaga e mafai ona faava’atu’ia ai le maopopoga o tagata faatuatua, o le ola taumasui.

O le tauimasui, o le toe taumafai lea o le tagata ua mafatia, e toe tau ai se mea leaga i le tagata na ia faia muamua ia te ia se mea leaga, ia pe na manu’a ai se lotu ia poo le tino foi o se tasi. O se galuega e toe

taui atu ai i se mea ua uma ona tupu, e pei o se ita ua faamoemoeina ina ia toe fai atu i se isi tagata se mea leaga.

I le Feagaiga Tuai lava ia, sa faatagaina ai e Mose le tauimasui, lea na faapea mai, ia taui atu le mata i le mata, o le nifo i le nifo, ae ina ua afio mai Iesu i le Feagaiga Fou, o lea ua le’o toe faaauauina ai lea tulaga. O la Iesu, ai se po mai i lou alafau taumatau, ia liliu atu i ai ma le isi itu. A fai atu lua te o i le maila e tasi, ia o ma ia i maila e lua.

E faapena foi le manatu o Paulo lea e pei ona fai mai ai o ia. Aua le faatoilaloina oe i le leaga, a ia faatoilaloina le leaga i le lelei. Ia agalelei atu i soo se tagata. Ia avatu i se ua fia ai se mea e ai, ia avatu foi i se ua fia inu se vai e inu ai o ia.

O apoaoaiga a Paulo e saga faamalosia ai pea le maopopoga ma le soifua lelei o tagata faatuatua i le ekalesia i Roma. O lona manatu lea e auala atu i lana tusi lenei e ui e lei feiloai i latou ma ia, ae o lo o i ai lona faamoemoe e malaga atu lava e feiloai ma i latou.

O se faaitaiga aoga foi lea ma se faamanatu taua mai le tatou mataupu i lenei taeao. Ia aua nei o tatou ola tauimasui, ae ia o tatou agalelei i soo se tagata. Ia tuu atu pea i le Atua poto e toatasi, na te faia lana galuega o le faamasinoga tonu mo’i tatou o lana fanau. O Ia na te taui mai ia i tatou, e tusa ma mea ua o tatou faia i lenei olaga le tumau. Tau a ina o tatou manatua o le na te faia le finagalo o le Atua, e maua e ia le manuia i le ola e faavavau.

#### **UIGA O UPU:**

matelaina - galalala i le fia ai poo le fia inu. Mativa, oge.

faafaupue - faaputu agai i luga

faatoilaloina - faaumatia, tuuifo i lalo, faafaia’inaina.

#### **GALUEGA FAATINO: Saili mai uiga faafeagai o upu nei.**

tauimasui - faamagalō, agalelei.

sauniuni - faatalalē, faatamala, lē ola tapenatēpena.

toasa - alofa

matelaina -

mauoa, tamaoaiga, malosi.

faafaupue -

aveese, soloia i lalo.

faatoilaloina -

faeaina, mamumalo.

leaga -

lelei.

#### **TAULOTO: A’oa’o le tauloto ua tuuina atu i tamaiti**

O le tauimasui o se amio e le lelei

Mai lava i aso la se ia oo mai i aso nei

E le fiafia i ai Iesu

Auā e le maua ai se nofo filemu.

Taui atu le leaga i le lelei

Ae le o le taui atu i le masei

#### **AOAOGA:**

1. Ia outou nonofo fealofani.
2. Ia loto fesoasoani ma agaalofa i e o mafatia.
3. Faatoilalo le leaga i le lelei e ala i le loto faamagalō.

.....

#### **ASO SA:**

**20 MATI, 2022.**

#### **MATAUPU:**

**IA LOTO FESOASOANI I E MATITIVA**

#### **SINI:**

Ia malamalama le vasega, o le tasi lea itu e ao ona faataua i lo tatou ola, o le loto fesoasoani i e puapuagatia aua e faapena foi le alofa mai o le Atua ia i tatou.

**TUSI FAITAU:** Teuteronome 15:7-10

**FESOASOANI MO FAIAOGA:**

I le soifua lava ia i totonu o soo se atunuu ma soo se nuu, o loo tou soifua ma o tatou ola ai, e le tutusa uma tagata. E i ai tagata e maumea, ia poo i latou ia ua tele o latou tamaoaiga e tua i ai, ona faasolo ifo ai lea i e feololo se'ia oo a i ē e matua maualalo lava lo latou tamaoaiga, ia poo i latou ia ua ta'ua o e matitiva. E i ai nisi ua faatasina solo i nofoaga faitele ona ua oge i le tamaoaiga, ia pe ua le lava foi le faasoa e soifua ma ola ai. E oo a i lavalava ma mea taumafa ua le gafatia ona maua.

O lea sa o tatou faitau i le Tusi o Teuteronome na tusia e Mose. O i lea ua faamanatu mai ai e le Atua ia Mose nisi o tulaga e ao ona faailoa atu i tagata o lona nuu ina ia soifua ma savavali ai. O le faamanatu ina ia aua nei o latou faatauagavale pe latou te faagalo i e matitiva. Peitai e ao ona agalelei atu ma ia maua e tagata uma le loto fesoasoani i a i latou e matitiva. Ia faamafola atu i ai o latou lima, poo le maua lea e i latou o le agaga o le loto foai i tagata ua matitiva ma fia maua se fesoasoani. O le faailoga o le alofa tunoa o le Atua e tutusa mo tagata uma. Sa oo foi le fia aai i le nuu ae sa tausia ma fafagaina i latou e le Atua i le latou malaga i le vao. O tapenaga uma nei e le Atua mo lona nuu auā lo latou sauni atu e fai mo latou tofi le nuu na folafolaina e le Atua i o latou augatamā e fai mo'i latou. Ia fiafia e ola foai mo e matitiva ma agalelei atu i soo se mea e manaomia e soo se tagata mativa.

O le upu moni o lea lava ua taua mai e faamanuia e le Atua tagata uma o e limamafola ia poo e limafoai ma loto fesoasoani i e matitiva. E le gata ina tamaoaiga i le ola nei, ae sili ona tamaoaiga i faamanuiaga mo le ola atali, ia poo le ola lava lea e faavavau.

**UIGA O UPU:**

faamaaa - lotomalo,  
mataoge - mata 'u, ai'u.  
faasaolotoga - tatala, faamagalalo.

**GALUEGA FAATINO:** TUSIGĀ FUAIUPU

Faaoga mai upu ua tuuina atu i lalo i ni au fuaiupu.  
*mativa, faamaaa atu lou loto, faamafola atu lou lima, loto leaga, tausaga o le faasaolotoga, mataoge, faamanuia.*

**PESE:** Alofa o se mea e te faasoa atu (Love is something...)

**AOAOGA:**

1. Aua tatou te faagalo le alofa o le Atua ia i tatou.
2. Aua tatou lima'u'u ma tatou vaai maualalo i e matitiva.
3. E faamanuia e le Atua le tagata e alofa ma limafoa'i i e matitiva.

.....

**ASO SA:** 27 MATI, 2022.

**MATAUPU:** O LE TULAFONO AURO.

**SINI:** Ia malamalama le vasega i le aotelega o tulafono a le Alii.

**TUSI FAITAU:** Mataio 7:7-12.

### **FESOASOANI MO FAIAOGA:**

O le Tusi sa faitauina, o nisi ia o upu o le lauga a Iesu i le mauga. O i o lo o faailoa ma ai e Iesu se ata faata'ita'i o se tama ma lona atalii. Fetalai Iesu, o ai so outou a ole mai lona atalii i se falaoa ae avatu i ai e ia se maa? A ole mai foi i se i'a ae avatu i ai e ia se gata? O le upu moni e leai lava se tama e na te faia lea tulaga aua e pele i matua uma a latou fanau, e pei a o le upu faa Samoa, o au o matua fanau. Ae o se faataitaiga manino lea ua aumai ai e Iesu se ata i le va feagai ai o i tatou o tagata, ma le Atua lo tatou Tama oi le lagi.

E silafia lelei e le Atua mea uma ua tatou mananao i ai, peitai o le tele o taimi ua tatou soona ole atu i le Atua i mea ua tatou manano i ai. Peitai ua silafia e le Atua o mea ia e ono avea ma gata ia poo maa foi i o tatou olaga. E silafia e Ia e leai se t'ua tele o mea ua tatou soona ole atu ai, aua e mafai ona avea lea ma ala e afaina ai le soifua manuia o i tatou o lana fanau, ma o le mafuaaga lena ua le mafai ai ona tali mai o Ia i o tatou manao.

Peitai o le umi o le mafutaga a le tagata ma le Atua, e ono mafai ona silafia ma mafana ai le sootaga a le tagata ma le Atua. O inā foi e ono mafai ai ona tali mai le Atua i soo se mea ua silafia e Ia e leo ni mea e ono avea ma gata ia pe avea foi ma maa e afaina ai o tatou olaga. O le Atua lava Ia o le Atua o le alofa ma le alofa mutimutivale uma lava. O lona finagalo foi ia o tatou alolofa atu i isi o tatou uso a tagata. Ia tatou faia mea uma ia pei ona o tatou manano e fai mai e isi tagata ia i tatou. O le atoaga lea, ia poo le aotelega lea o le tulafono ma le au perofeta, lea ua ta'ua o le tulafono auro.

Aua o le upu moni e leai lava se tasi alofa e sili i loo lenei alofa, ina ua Ia ofoina mai lona ola e sui ai i tatou o tagata agasala. O le ala lea e ao ai ona e alofa atu i le lua te tuaoi ia pei o oe lava ia te oe, e te alofa atu foi i le Alii lou Atua ma lou manatu atoa, ma lou malosi atoa, ma lou agaga atoa.

### **UIGA O UPU:**

au perofeta - auauna a le Atua, (latou te faailoa le finagalo o le Atua i tagata)

### **GALUEGA FAATINO: TAULOTO**

Ia tusi i lalo i lona faapuupuuga masani ma tauloto mai e le vasega tulafono e 10 a le Atua. (Esoto 20:3 – 17).

O le avanoa lelei foi lea e a'oa'o ina lelei ai tulafono e 10 i tamaiti.

### **AOAOGA:**

1. Aua tatou te manatu faapito na'o i tatou lava.
2. Ia tatou fiafia e fai mea lelei i isi tagata.
3. Alofa i le Atua ma alofa i ou tuaoi.

.....

### **MANATU TAIALA O APERILA: O LE ATUA FAAMAGALO AGASALA.**

O aoaoga i le vaiata o le Feagaiga Tuai, a oo ina fai e se tagata se mea leaga, ia pe agasala foi, e faasala lava o ia. Lea e i ai le faasalaga a le nuu o le Atua e fetogi i maa se tagata ua agasala ia oti ai o ia. Peitai, o le afio mai o Iesu i le vaiata o le Feagaiga Fou, ua mafai ai ona tuu avanoa le Atua i le tagata, e filifili pe salamō ma liliu ese mai le agasala. Afai e salamō le tagata mai le leaga ma mulimuli i ala o le Alii, o lona uiga, o le a faamagaloina o ia e le Atua.

**ASO SA:** 3 APERILA, 2020.

**MATAUPU:** IA MAUA E I TATOU LE LOTO  
FAAMAGALO

**SINI:** Ia malamalama le vasega o le ola  
fefaamagaloai o le tasi lea o aoaoga a lo tatou  
Alii o Iesu mo'i tatou.

**TUSI FAITAU:** Neemia 9:16-18

**FESOASOANI MO FAIAOGA:**

Tamaiti, o le a foi le uiga o le upu faamagalo? Ioe, o le lē tauimasui,  
poo le faauma ma le faate'a o le ita i le isi tagata e tusa ai ma se mea  
sese, poo se mea leaga na fai e le isi i le tasi.

O le vaega lea o le tusi na tatou faitau i ai, o se vaega o sauniga o  
tatalo ma anapogi a le nuu o Isaraelu i le Atua, ina ia faamagaloina i  
latou mai a latou agasala. O tu lava ia ma aga a le nuu o le Atua. E i  
ai lava taimi ma aso faapitoa e fai ai a latou sauniga ma a latou taulaga  
osi i le Atua, mo le faamagaloina o agasala e faaogaina ai manu e pei  
o oti ma isi.

Ua toe faamanatu mai e Neemia taimi ao i ai le nuu i le latou malaga  
i le vao. O se nuu lava e faamaululuga ma faamaaa o latou loto. E tele  
foi ina le faalogo i poloaiga a le Atua. Peitai sa faamagalo lava e le  
Atua i latou. E moni lava o le Atua faamagalo, e televave lona alofa  
ae telegese lona toasa. E ui foi ina latou le manatua vavega e tele na  
faia e le Atua moi latou i le vao, e pei o le taitaiina o'i latou e le afi-  
faaniutu i le po, ma le ao-faaniutu i le ao, vaeluaina o le sami-ulaula,  
fafagaina o'i latou, o le papa na tafe mai ai le vai e feinu ai, peitai na  
faamagalo lava i latou e le Atua. O lea lava na faataunuaina foi lava e  
le Atua lana folafolaga ma taunuu ai i Kanana o le nuu na folafolaina  
e fai mo latou tofi.

Tamaiti o le tasi lea o natura o le Atua e ao ona tatou maua. O le loto  
faamagalo. Poo a ni mea tiga e fai mai e se isi tagata ia te oe, ia tatou  
maua le loto faamagalo, ae a fai tatou te lē ola faamagalo atu i isi o  
tatou uso a tagata, o lona uiga e le faamagaloina foi a tatou agasala e  
le Atua. O le upu moni, e leai lava se tasi e leai sana agasala, o le mea  
lea e ao ai ona o tatou maua le loto faamagalo, ona mautinoa lea o le  
a faapena foi ona faamagaloina a tatou agasala e le Atua, e pei ona  
fetalai ai Iesu i le Mataio 18:21-22.

**GALUEGA FAATINO:** FETUFAAIGA

Ia tuuina atu i le vasega mataupu ua tuuina atu i lalo e ono tutupu ai  
ni vevesi i le va o le isi tagata ma le tasi, e fetufaaai ai manatu ma  
lagona o le vasega.

1. Ua e maua atu se tagata ua gaoi i le tou maumaga; O le a sau  
faatinoa poo se aualea e te faia e iloa ai e te faamagalo ai i  
lea tagata?
2. Ua tulei oe e le isi tama/teine ma ua e sulu ai.
3. Ua togi mai e se isi le maa, ma ua e afaina ai ae lei fuafuaina.

**PESE:** E lo'u Alii ua ou sesē (Pese ma Viiga 136)

**AOAOGA:**

1. Ia faamagalo atu i e ua agaleaga mai.
2. Na maliu Iesu mo le faamagaloina o a tatou agasala.
3. Aua nei goto le la o e ita pea.

.....

**ASO SA:** 10 APERILA, 2022 (ASO SA LAUPAMA).

**MATAUPU:** O LE MALAGA A IESU I IERUSALEMA.

**SINI:** Ia malamalama tamaiti i le tāua ma le faamoemoe o le malaga a Iesu i Ierusalem.

**TUSI FAITAU:** Luka 19:36-40.

**FESOASOANI MO FAIAOGA:**

O le malaga a Iesu i Ierusalem, o le malaga o le manumalo (triumphal entry) ia poo le malaga faatupu. O le malaga e pei ona molimauina e le au fai Evagalia faimai ua fola e tagata lau pama atoa ai ma o latou ofu i le ala, ao tietie atu Iesu i le tamai asini agai i Ierusalem. Faimai ua alalaga tagata ma faapea ane, “Osana, osana, osana i le Alo o Tavita, Ia manuia le Afio mai i le Suafa o le Alii”. Ao le taunuuga foi lea o le valoaga a le perofeta o Sakaria, “Sakaria 9:9”. Peitai e toatele lava tagata ua vaai ma o latou molimau i vavega e na faia e Iesu, e le gata i le faamaloloina o mai, ae faapena foi ma le toe faatutuina mai o e ua oti e pei o Lasalo. Ao le vaitau tonu foi lea e masani ona malaga ai le toatele o tagata Iutaia i le laumua i Ierusalem, aua le faamanatuina o le tausamiga o le paseka. O le pisapisao ai la o nei tagata ma alalaga, na ala ai ona fai atu le au faresaio ia Iesu, e na te vavao ia te’i latou. Peitai ua fetalai atu Iesu ia te’i latou, afai e le alalaga i latou nei, e mafai lava e maa ona alalaga mai.

O le manatu o le toatele o tagata Iutaia na i ai, o le taunuuga lava lea o le afio mai o lo latou Mesia na valoia e perofeta. Peitai, e ese le agaga lea o lo o latou mananao i ai. O lo latou manao ia afio mai so latou Mesia i se tulaga o le malosi faafitafita e pei o Tavita, e na te taitaia taua, ma toe faaeaina lo latou pologa, ma ia toe faasao ma laveai mai i latou mai sauaga a isi malo e pei o le malo Roma. Peitai,

e sao ai le molimau a Isaia, “Isaia 55:8-9”, “o outou manatu e le o o’u manatu ia”.

O loo mafuli manatu o tagata Iutaia, i malo faapolokiki i le lalolagi nei, a’o malo ia e mavae, e le tumau, peitai o le malo o le Atua, o le malo lava e taunuu i le ola e faavavau, lea e nofotupu ai le Alii o Iesu. O le ala lea o le ese ai lava o le faamoemoe o le Alii o Iesu i lana malaga i Ierusalem mai manatu o tagata Iutaia.

O le faamoemoe o Iesu, o ‘i lea o le a tualuga ai lana galuega faa misionare na afio mai ai i le lalolagi. O lea lava ua nofo sauni o Ia e feagai ma tiga ma puapuaga, o le teena atoa ai ma le faalumaina o Ia, se’ia oo a ina maliu o Ia i luga o le satauro aua o Ia lava o le tamai mamoe a le Atua, a fasia mo le paseka ina ia faamagaloina agasala a le lalolagi.

**GALUEGA FAATINO: FAATINOGA**

Faatino le tala sa faitauina mai le Tusi Paia

**PESE:** Osana pepese tamati uma

**AOAOGA:**

1. O Iesu lava o Ia le tupu i le malo o le lagi.
2. Ua teena ma lē talia e tagata le afio mai o le Mesia.
3. Ia fai Iesu ma o tatou Tupu tatou te tumau ai.

.....

**ASO SA:** 17 APERILA, 2022. (ASO SA TOETU).

**MATAUPU:** UA TOETU IESU

**SINI:** Ia malamalama le vasega, o Iesu na maliu ma tanumia i le tuugamau, ua toe soifua ma toetu mai.

**TUSI FAITAU:** Luka 24: 1 – 12

**FESOASOANI FAIAOGA:**

E tulaga ese lenei aso i le kalena a le au Kerisiano i Samoa nei ma le lalolagi atoa, ona o le aso ua faamanatu faatasi ai le taeao fou i le ola faa-le-faatuatua o tagata talitonu ia Iesu Keriso, e ala i le Toetu. O le Toetu tamaiti, o lona uiga o le tagata na oti, ae ua toe ola mai. O le aso Faraile na te'a nei, na faamanatu ai le aso na faasatauroina ai Iesu ma maliu ai, e pei ona faaigoaina o le aso Maliu. Sa tuu lona tino i le tuugamau ma pupuni i le maa.

O le ulua'i aso o le vaisapati, ua tea le Aso Sapati faa-Iutaia, na o ai fafine e to'atolu, o Maria le Makatala ma Ioana, ma Maria le tinā o Iakopo, e ave mea manogi i le tuugamau. E taunuu atu, ma latou iloa ai, ua fulieseina le maa na pupuni ai le tuugamau. Ua ulu i totonu, a ua latou le iloa le tino Iesu. Ua alu ese Iesu mai le tuugamau, auā ua toe ola mai i le ola fou, ua toetu Iesu.

Ua latou matata'u, a ua fai mai ia i latou tagata o lo o ofu i ofu pupula; *“Se a le mea tou te saili ai le ua toe ola mai i ē ua oti? Ia outou manatu i lona fetalai atu ia te outou, ina o i Kalilaia o Ia. E tatau ona tu'uina atu o le Atalii o le tagata i luma o tagata agasala, ma ia faasatauroina, ma toe tu mai le aso tolu”*.

Tamaiti, na faasatauroina Iesu, na maliu, ua mavae aso e tolu ona toe tu mai ai lea o Ia. Ua toe soifua mai le Alii. Iesu na maliu mo le faamagaloina o agasala a tagata uma o le lalolagi. Ua lē toe i ai o Ia i

le tuugamau, a ua tu mai i le ola fou, ina ia maua e tagata uma le ola pea.

**UIGA O UPU:**

vaisapati - o le aso e soso'o ma le sapati.  
tafa o ata - ua latalata ina malamalama le aso fou i le ave o le la.  
fememea'i - ua leiloa le mea e fai.  
soifua - o le upu fa'aaloalo o le ola  
toetu - ua toe ola mai  
matata'u - fefefe

**GALUEGA FAATINO: FAATINO LE TALA**

E masani lava i Aoga aso Sa le faia o faatinoga e uiga i le aso Sa lenei o le Toetu. E fautuaina ai foi le faia o le faatinoga o le tala sa faamatalaina, e saga faamanatu ma faatāua ai pea i manatu le tāua o lenei aso Sa.

**PESE:** 51 (Pese ma Viiga)

**A'OA'OGA:**

1. Ua toe tu manumalo le Alii o Iesu mai le oti ma le tuugamau.
2. Ia faafetaia le Atua i lona alofa, e ala i le faaolataga.

.....



**ASO SA:** 24 APERILA, 2022.

**MATAUPU:** TUMAU I LE ALII.

**SINI:** Ia malamalama le vasega, o lē tumau i le Alii e lavatia puapuaga o le ola.

**TUSI FAITAU:** Iakopo 1:12-15

**FESOASOANI MO FAIAOGA:**

E taua tele le faamanatu mai a Iakopo i lana tusi sa o tatou faitauina i lenei taeao, e uiga lea i le tulaga tau i faaososoga atoa ai ma le tulaga e tau o le tofotofoina o le tagata. O le upu moni, o lo o tatou ola nei i se olaga o feteenaiga o mea lelei ma mea leaga. O le olaga o mea e tatau ona tatou faia tatou te maua ai lo tatou Alii o Iesu, a ua tele ina faalavelaveina i tatou e le tiapolo ia poo Satani foi.

O lea lava o lo o manino mai i le tatou tusi faitau, e le faaososoina se tasi e le Atua, aua e le faaososoina e le Atua se tasi e fai se mea leaga. Peitai o le mea mautinoa, e faaososoina le tagata e Satani, ona ua tosina lona loto i le tu'inanau. Lea e faimai ai le fuaiupu e 15: *Pe a to le tuinanau ona fanau mai ai lea o le agasala, a matua le agasala, ona fanaua mai ai lea o le oti.*

O mea lava ia e lua e tele ina fefinaua'i i taimi ma aso uma o lo tatou ola. O le faaososoga mai le tiapolo ina ia fai le leaga, ma le onosai i tuinanauga leaga e i'u ai i le agasala ma le oti. Peitai, o lē a e tumau i le Alii, e lagona e ia le alofa moni i le Alii, e mautinoa e le mafai ona sese pe pa'u atu i le faaososoga a le fili ma le tiapolo. O ia lea ua sao mai i ia faaososoga uma, o ia foi lava lea ua taua ua manumalo i le tofotofoga. Ao lea ua taua mai e Iakopo o lē manumalo i le tofotofoga e maua e ia le pale o le ola.

Ioe le fanau e, o lo tatou tumau i le Alii, tatou te manumalo ai i mailei ma faaososoga leaga a le tiapolo, e taumafai e faaleaga i tatou. Aua

nei tuinanau gofie i tatou i mea leaga o lenei lalolagi. Aua a to le tuinanau ona fanau mai ai lea o le agasala, a matua le agasala ona fanau mai ai lea o le oti. Ae a tumau pea i tatou i le Alii, e ala i le toaga i le lotu, aoga Aso Sa, usitai i matua, faaaloalo i soo se tagata, e manumalo foi i tatou i tofotofoga uma ma maua ai e'i tatou le pale matagofie o le ola e faavavau, ua folafola ma saunia e le Alii mo'i tatou o lana fanau.

**UIGA O UPU:**

onosai -	faapalepale
faaososoga -	manaoga poo tuinanauga le lelei
tofotofoina -	su'esu'eina

**GALUEGA FAATINO:** TUSIGA SOLO.

Tusi mai sau solo e lua fuaiupu e faatatau i le mataupu: **“Tumau i le Alii”**.

Faaitaiga:

O le fili lava ia e le moe,  
E taumafai e faasese ia te au ma oe.  
A'o lo tatou tumau i le Atua,  
O lona finagalo ia ta faamuamua.

Aua nei faaososoina gofie i tatou,  
E pei o le tala i le fuata ma lona lou.  
Tumau i le Alii e manuia ai,  
Le pale o le ola ia tatou pale uma ai.

**PESE:** A Tumau ia Iesu

**AOAOGA:**

1. Ia faalagolago i le Alii i soo se mea e te manatu i ai.
2. Aua le faamoemoe i lou lava atamai.
3. O Iesu o le pogai ma le puna o manuia mo lo tatou ola.

**MANATU TA'IALA O ME: O LE ATUA E PAIA MA MAMALU**

E leai lava se isi atua e sili atu nai lo tatou Atua o loo tatou talitonu i ai, tapua'i i ai, ma o tatou tatalo i ai. Ua na o Ia foi e ona le mamalu ma le silisiliese, auā o Ia lava na faia mea uma lava i le lagi ma le lalolagi e oo lava foi i le ola o le tagata.

**ASO SA: 1 ME 2022**

**MATAUPU: UA FAAALIA LE MAMALU MA LE SILISILI ESE O LE ALII**

**SINI:** Ia malamalama le vasega, o le faaolaina o le tama a le fafine ua oti lana tane, ua faaalua ai le mamalu o le Alii o Iesu.

**TUSI FAITAU:** Luka 7: 11 – 17

**FESOASOANI MO FAIAOGA:**

O le alofa o Iesu e agavaa mo tagata uma. E aofia ai tagata mama'i, o tagata malolosi, e aofia ai ma tagata mafatia uma. Sa mafatia le fafine ua oti lana tama e to'atasi, i le nuu o Naina. E le gata o le oti o lana

tama e toatasi, a'o ia o se tinā ua leva ona nofo to'atasi, ina ua oti lana tane. O le ala lea o le mafatia tele, ma ua tumu le loto o le tinā i le faanoanoa.

E oo atu Iesu ma ona so'o i le faitotoa o le aai lea e igoa o Naina, ae fata mai e tagata le tino o le tagata ua oti. O si tama e to'atasi a le fafine ua oti foi lana tane.

Ua silasila atu i ai Iesu, ma ua Ia silafiaa le mafatia tele o si tinā. Ona mutimutivale lea o le alofa o le Alii ia te ia. Ua fetalai atu i le fafine, **“Aua e te tagi.”** Ua oo atu Iesu ma pa'i i le fata, ona tutū mai ai lea o tagata na latou amoina le fata o le tama ua oti. Ona fetalai atu lea o Iesu, **“Le taulealea e, ou te fai atu ia te oe, Ina tula'i ia”.** Ona nofo ai lea i luga o le tama na oti, ua tautala. Ona tu'uina atu ai lea e Iesu i lona tinā. Sa matata'u le vaega o tagata sa vaavaai ma molimauina le mamalu ma le silisili ese o le Alii o Iesu, e ala i le toe ola mai o le tama na oti, ina ua faatuina e le Alii o Iesu. I totonu o le matata'u o ia tagata, sa o latou vivii ai i le Atua ina ua o latou talitonu ia Iesu. Ua faaalua lo latou vivii ina ua latou ta'utino, **“Ua tu mai ia te'i tatou le perofeta sili. Ua asiasi mai le Atua i lona nuu”.**

O le oti o le tagata, e lē mafaia e se isi lava malosi ona ia liua i le ola. Ua na o le mana lava o le Alii e mafaia, e pei ona molimauina i le tala o lenei aso Sa. O vavega foi e faia e Iesu, o le faaalua lava lea o lona mamalu ma lona silisili ese, a'o i ai i le lalolagi nei.

**GALUEGA FAATINO: FAATULAGA I LE TULAGA SA'O**

Toe faatulaga ile tulaga sa'o na tupu i le tala.

1. Ua matata'u tagata, ma ua o latou vivii atu i le Atua. (6)
2. Ua fetalai atu Iesu i le tama ua oti, ona toe ola ai lea. (5)
3. Ua oo atu Iesu ma ona soo i le nuu o Naina. (1)
4. Ua silasila atu Iesu i le fafine, ona mutimutivale ai lea o lona alofa. (3)
5. Ua fata mai le tagata ua oti. (2)
6. Ua pa'i atu Iesu i le fata. (4)

**PESE:** Mafatiaga e ave ia Iesu (Cast your burden unto Jesus)

**A’OA’OGA:**

1. O Iesu le tupu e mamalu.
2. E ave’ese e Iesu o tatou faanoanoaga.
3. E pule aoao le Atua i le ola

.....

**ASO SA:** 8 ME 2022 (ASO SA TINĀ)

**MATAUPU:** O IOKAPETA LE TINĀ LOTOTELE

**SINI:** Ia malamalama le malamalama, na fai e Iokapeta le auala e faasaoina ai lana tama o Mose mai le pule sauā a Farao.

**TUSI FAITAU:** Esoto 2: 1 – 10

**FESOASOANI MO LE FAIAOGA:**

O le ulugalii o Amaramo ma Iokapeta, o tagata sa tupuga mai le au sā Levi i le nuu o Isaraelu. Na fanau e le tinā ia Iokapeta se tama tane i le vaitaimi o le malosi o le tulafono a le tupu o Farao i Aikupito. Na faia ai le tulafono, a fanau mai se tama teine, ona faaola lea, ae a fanau mai se tama tane, ona fasioti lea. O le mea ua tupu, ua alofa Iokapeta i si ana tama ua ia fanauina, ona o le tama. O lona iuga, o le fasioti e le au Aikupito.

Sa tausī ma nanā e Iokapeta si ana tama, seia oo ina atoa le tolu masina, ma ua lē toe mafai ona nanā o ia, auā ua leo tele le tagi a le tama. Na iloa lelei e Iokapeta, ua le toe saogalemu le ola o si ana tama, pe a fua i le tulafono.

Ua ia lalaga se ato kome, ma faapulu i le pulu emeri, ma le pulu safeta, ina ia aua nei sao atu se vai i totonu o le ato. Ua fofola foi le ie, ma tuu loa i totonu si ana tama, ona faatafetafea lea i le auvai o le vaitafe, a o vaavaai atu i ai lona tuafafine o Miriama. Sa o ane le taelega a le afafine o Farao ma ana auauna teine i le vai, ma latou mauaina ai le ato o tafetafea atu. Ua tatala le ato, ma maua ai se pepe aulelei tele. Ua tagi le tama, ona alofa lea i ai o le afafine o Farao ma faapea lana tala, e pei lava o se tamaitiiti Eperu lenei. Ua fai atu Miriama ia te ia, pe a alu e su’e mai se fafine Eperu na te tausia le tama mo ia. Na alu Miriama i lona tinā, ona sau ai lea o Iokapeta. Ona fai atu lea o le afafine o Farao ia te ia, “Ia e ave lenei tama ma e tausī mo a’u.” Ua ia faaigoa foi le tama iā Mose, **auā o le tama na ia toina a’e nai le vai.** Sa lagona le fefe ma le popole o Iokapeta i le taimi na fanau mai ai lana tama, ae sa ia maua le loto tele e fai le auala e faasaoina ai o ia. O le faailoga lea o le auai o le alofa o le Atua ia Iokapeta, ma faiga ina ia faasaoina ai le ola o si ana tama. O le faasaoina foi o le ola o le tama, e pogai mai le lototele ma le to’a o le loto o Iokapeta, ina ua finau ma saili se auala ina ia faasaoina ai le ola o lana tama.

**GALUEGA FAATINO:** TALIGĀ FESILI

Tali i fesili ua tuuina atu i lalo.

1. O fea le tupuaga o Iokapeta?  
Tali: E tupuga mai le au sa Levī, o le isi ituaiga o Isaraelu
2. O fea le nofoaga sa tupu ai le tala o lenei Aso Sa?  
Tali: O Aikupito
3. O le a le tulafono sa faia e Aikupito?  
Tali: A fanau se tama ia fasioti, ae a fanau se teine ia faaola.
4. O le a le matua o le tama, na lē toe mafai ai ona nanā e lona tinā?  
Tali: E tolu masina.
5. O le a le auala na faasaoina ai le tama a Iokapeta?  
Tali: Na faatafea i le vai, ina ua tuu i totonu o le ato kome.

6. E faapefea ona faamatala le alofa o Iokapeta?  
Tali: (faamatala)

**PESE:** (fati: see mai le fee)

1. O Iokapeta le tinā  
Mata'utia lona to-a  
Na ia nanā ai o si ana tamā  
Fitafita taulamalama  
Fasioti uma pepe tama  
Talu ai le Farao leaga
2. Le ato kome ua lalaga  
Iokapeta ma loimata  
Tau lava ia faasao ai le tama  
Tuu loa i le vai  
Faatafea atu i gatai  
Le Atua e silasila i ai.

**A'OA'OGA:**

1. O le alofa o le tinā e moni ma faamaoni
2. Ia o tatou manatua ma le alofa nai o tatou tinā

.....

**ASO SA: 22 ME 2022**

**MATAUPU: TALANOAGA I LE VAIELI**

**SINI:** Ia malamalama le vasega i le talanoaga sa faia a Iesu ma le fafine Samaria i le vaieli.

**TUSI FAITAU:** Ioane 4: 19 - 26

**FESOASOANI MO FAIAOGA:**

Na tuua e Iesu le nuu o Iutaia, ma agai atu mo Kalilaia. Peita'i, o le oo atu i Kalilaia, e ui atu i Samaria. Ma o le ala lea o le i ai o le talanoaga a Iesu ma le fafine i le vaieli, ina ua afe ane le Alii ma malolo ai, toe faaauau ai le malaga i Kalilaia.

Ua mae'a le talanoaga e uiga i le vai, o Iesu lava lea, ina ia talia e tagata uma, e maua ai le ola e faavavau. Ua oo le talanoaga a Iesu ma le fafine lava lea, i le mauga. Manatua foi, o le talanoaga o loo faia, o loo fai i luga o le vaieli. Ae o le vaieli o lo i luga o le mauga. O le mauga lea sa fai ma nofoaga e o mai i ai tagata Samaria e tapuai ai i le Atua. O lo latou talitonuga mai lava i le Feagaiga Tuai, o le mauga, o le nofoaga o le Atua. Ua fai mai le fafine o le mauga lenei matou te tapua'i ai, matou o tagata Samaria. Peita'i o outou (tagata Iutaia) ua fai mai o Ieruselema tou te tapua'i ai. Ua tali atu Iesu, ***“E oo mai le aso tou te tapua'i i le Tamā e le gata i lenei mauga, po o Ieruselema. Tou te tapua'i ma le lē iloa, a o matou o tagata Iutaia ua tapua'i ma le iloa, aua e mai ia Iutaia le faaolataga. A e oo mai ona aso, ua oo nei foi i ai, o e tapuai faamaoni latou te tapuai i le Tamā i le agaga ma le faamaoni, aua o loo saili le Tamā i e tapua'i faapena ia te ia”***.

O loo tumau pea le lagona i sootaga faa-le-tagata, i le fafine o loo talanoa ma Iesu. Le va tagata e ese ai le Iutaia, ese le Samaria. Peita'i o le fainagalo o le Alii, e tasi lava le Atua o loo tapua'i i ai le Iutaia ma le Samaria. Pau lava lona, o le loto ma le agaga o loo faamaite ai.

O le mea o loo mana’o ai Iesu ia’i tatou tamaiti, ina ia tu’u atu atoa o tatou agaga ia te ia, ina ia fiafia mai o Ia ia’i tatou. O le loto mama, loto alofa, ola usita’i ma amio lelei o le ola tapua’i faamaoni lava lea i le Atua. Ia toaaga e tatalo, ma faitau le Tusi Paia i aso uma.

**GALUEGA FAATINO: FAATINO LE TALA**

E lelei pe a faatino le tala, e saga faamanino ai le talanoaga a Iesu ma le fafine i luga o le vaieli. Ua masani lava i talanoaga faasamasamanoa ma nisi o mataupu. E lelei ai le tuuina atu o le mataupu o lenei aso Sa, e faatino ai le talanoaga e pei ona faamatalaina.

**PESE:** Ta’u mai tala ia Iesu (Tell me ta stories of Jesus)

**A’OA’OGA:**

1. Ia fiafia e talanoa ia Iesu.
2. Ia tapua’i i le Atua ma le faamaoni.

.....

**ASO SA**                    **29 ME 2022**

**MATAUPU:**            **AGALELEI ATU, E FAASAOINA AI**

**SINI:**                    Ia malamalama le vasega, o le agalelei atua o Raava i tagata Isaraelu e toalua, na faasaoina ai o ia ma lona aiga.

**TUSI FAITAU:**        Iosua 2: 1 – 19

**FESOASOANI MO FAIAOGA:**

Na aauina atu e Iosua tagata e toalua e o e asiasi i le nuu o Ieriko. Na o atu i la’ua ma ulufale atu i le fale o le fafine e igoa ia Raava ma nonofo ai. Ua oo le tala i le tupu o Ieriko o loo i ai tagata e toalua i totonu o le aai, o lea na alu ai lana feau ia Raava, ina ia tuu atu nei tagata na ulufale atu i lona fale, auā na la o atu e asiasi ma vaavaai i le nuu uma. A’o Raava, ua ia ave nei tagata e toalua ma nanā i luga o lona fale, ma tanuma’i ia te’i la’ua i laau o lino na folasia i luga o le fale. Ua ia fai atu i e na auina atu e le tupu, o ia e na te lē iloa 21 ii21 o 21 ii21 fea i la’ua. Ina ua lata o le a tapuni le faitotoa o le aai, ona o atu ai lea o ia tagata. Na faatonu foi e Raava tagata na auina atu e le tupu, ina ia vave ona tuliloa atu ia te i la’ua, auā latou te maua atu lava.

Sa iloa e Raava mea ofoofogia ma vavega uma na faia e le Atua mo lona nuu o Isaraelu, talu ona o ese mai Aikupito. O le ala lea na ia fai ane ai i tagata Isaraelu e toalua na ia nanāina, ina ia faasaoina o ia ma lona aiga pe a foa’iina atu e le Atua le nuu uma o Ieriko mo Isaraelu, auā na ia agalelei atu ia te i la’ua. Sa iloa ma malamalama lelei Raava i le tulaga o le a oo ia Ieriko, pe a fua i le o ese mai Aikupito ma le vaeluaina o le sami ulaula, aemaise le faatoilaloina o Sekono ma Oto, o tupu o sa Amorī, i le ma le tele o vavega na faia e le Atua mo Isaraelu.

O le loto tele o Raava i lona nanāina o tagata Isaraelu e toalua, o lona agalelei lava lea ia Isaraelu ma le fuafuaga na faia e le Atua mo le manumalo o le nuu. O le iuga lava o le tala, na lavea’iina o ia ma lona aiga uma, ina ua faaumatia e Isaraelu tagata ma mea ola uma sa i ai i Ieriko.

**UIGA O UPU:**

lino – o le laau sa fa’aaogā e fai ai lavalava.

**GALUEGA FAATINO: TALA TOE FAAMATALA**

Faasolosolo le vasega i luga ina ia toe faamatala mai le tala sa faamatalaina. O le tāua o lea galuega, o le mafai lea ona o latou tautatala ai. I le taimi lava foi lea, o loo a’oa’oina atu ai le isi na misi lana faalogo.

**TAULOTO: a’oa’o le tauloto lenei i le vasega**

Agalelei atu e fiafia i ai le Atua  
A’o le agaleaga atu, e lima 22 ii tua  
Faalogo i le Agaga o le Atua  
E lavea’ina 22 ii tāua ma o ta matua

**A’OA’OGA:**

1. Ia iloa ona ola fesoasoani atu i le isi.
2. Ola mata’u i le Atua e manuia ai.

.....

**MANATU TA’IALA O IUNI: O E ATUA O LE OLA**

O le Atua na faia le lagi ma le lalolagi ma tuuina i ai le ola. O le ola lea o loo tatou manavaina ma olaina i aso uma, a’o tatou i ai i lenei lalolagi. O le Atua foi, e pule i le ola. O Ia foi, o le Ola mo le tagata faatuatua faamaoni.

**ASO SA: 5 IUNI 2022**

**MATAUPU: O LE ASO PENETEKOSO**

**SINI:** Ia malamalama le vasega i le aso Penetekoso, ma lona tāua.

**TUSI FAITAU:** Galuega 2:1-4

**FESOASOANI MO FAIAOGA:**

O le aso Penetekoso, o le aso e atoa i ai le 50 aso talu ona faamanatu e tagata Iutaia le aso o le Paseka. O le aso faamanatu o le Paseka, o le aso e toe faamanatu mai ai i tagata Iutaia le alofa laveai o le Atua ma le faasa’olotoina o tagata Iutaia mai le nofo pologa i Aikupito. O le aso e toe to manatu ai tagata Iutaia i le faaolataga a le Atua, na aveese mai ai i latou mai le pologa i Aikupito ina ua sopoloa le to’asa o le Atua mai tagata Iutaia, a ua aoa’i ma afaina ai tagata Aikupito.

O le aso e atoa i ai le fitu vaiaso talu ona maea le Paseka. Fai mai o le aso lea e momoli ai le viiga ma le faafetai a le nuu i le Atua ma ofoina i le Atua ulua’i fua o faatoaga. O le aso o le omai faatasi o le nuu e momoli i le Atua le viiga ma le faaneetaga, ona o lona alofa ma lona agalelei, i le taimi o le tala faasolopito, (Feagaiga Tuai).

Peita’i i le taimi o le Feagaiga Fou, ina ua maluu Iesu ma toe tu manumalo mai le oti ma le tuugamau, ona faitau lea o le 40 o aso talu ona toe tu mai. O le tāua o lea aso i le kalena o le au Kerisiano, ona o le aso lea na afio a’e ai le Alii i le lagi i lona Tamā. (Ascension). Lea ua faaaogaina o le aso o le “**Afio a’e**”.

Ona faatali ai lea mo le 10 o aso, e afio ifo ai le Agaga Paia, e pei ona i ai le aso Penetekoso. O le aso e atoa iai le 50 o aso, talu ona toetu le Alii o Iesu ma afio a’e i le lagi, ae afio ifo le Agaga Paia, e faaauau le galuega o le faasalalauina atu o le talalelei, e ala i lona mana e fesoasoani i le au soo ma le au Aposetolo.

O le aso o le talisuaga faa-Iutaia, ma o le afuaga lea na mafuta faatasi ai soo o Iesu ma le motu o tagata i le mea e tasi, lea na afio ifo ai le Agaga Paia i luga o i latou e pei ona faamatalaina e Luka. Fai mai ua agi tele le matagi ma ua faatumulia ai le fale uma, ma ua afio ifo le Agaga Paia faapei o se afi i luga o i latou uma, ona latou tautatala ai lea i gagana eseese. E gagana le au Kerisiano, o le aso lea ua fai ma aso fanau o le ulua’i Ekalesia Kerisiano, ina ua liua e le Agaga Paia loto o tagata, e fai ma Kerisiano. O tagata ua talitonu ma talia le talalelei ia Iesu Keriso, e ala i le faaolataga, e pei ona maluu ma toe tu

manumalo mai ai. O loo faamanatuina e tagata Kerisiano le Penetekoso i tausaga uma, e manatua ai le Afio mai o le Agaga Paia o le Alii i le lalolagi, e fai ma fesoasoani i lana tagata.

**GALUEGA FAATINO:** TUSIGA SOLO  
Tusi mai se solo e faatatau i le aso Penetekoso. Pule lava i le telē.

1. E vivii a'e i le Atua lo'u loto  
Ina ua aulia mai lenei aso Sa Penetekoso  
E faamanatu ai le alofa o le Atua  
Le Talalelei lea ua i o tatou laufanua  
Aso fanau o le ulua'i Ekalesia  
Iesu Keriso le Ao o le Ekalesia  
Ua afio mai le Agaga Paia  
E fesoasoani mai ma faamanuia

**PESE:** Afio maia Iesu e (Pese ma Viiga 77)

**A'OA'OGA:**

1. Ia manatua le aso Penetekoso o le aso na afio mai ai le Agaga Paia.
2. Ia tatou talia le Agaga Paia e fesoasoani mai.

.....

**ASO SA:** 12 IUNI 2022

**MATAUPU:** ALOFA I Ē AGALEAGA MAI

**SINI:** Ia malamalama le vasega, na alofa Elisaia ia Suria ina ua o mai e si'itaua mai iā Isaraelu.

**TUSI FAITAU:** 2 Tupu 6: 8 - 23

**FESOASOANI MO FAIAOGA:**

Ua sii taua mai Suria ia Isaraelu, a ua leiloa e le tupu o Isaraelu. Auā ua latou fia fasioti ia Elisaia le perofeta, ona ua leai ma se mea faalilolilo a le tupu Suria e le iloa e Isaraelu. Auā o le perofeta o Elisaia ua na iloa mea uma ma na ia ta'u atu i le tupu. Ua lē faatasi pe faalua ona tapena le tupu o Suria ma lana au tau, i ni auala ina ia o latou faatoiloina ai le tupu o Isaraelu. E fiu e faalilolilo le faiga o a latou osofa'iga, e uma ona faailoa e le perofeta o Elisaia i le tupu o Isaraelu, ma lē taunuu ai fuafuaga a le tupu o Suria ma lana au tau. Ua faasaga le osofa'iga a le tupu o Suria ma lana vaega ia Elisaia, le auauna a le Atua. Sa alu lea osofa'iga i le po, ma ua si'o le aai, le vaega o loo i ai Elisaia.

Ua ala po le auauna a Elisaia, ma ua vaai atu ua siomia laua e le au tau toatele a Suria. Ona popole ai lea ma fefe le auauna. A ua tatalo Elisaia i le Atua, ina ia faapupula mata o le faatuatua o lana auauna. Ua ia vaai ona lē toe fefe ai lea. Ua toe tatalo Elisaia i le Atua, ina ia faatauasoina mata o le au tau a Suria. Ona oo mai lea o fitafita a Suria, ua fai atu le perofeta, mulimuli mai ia te a'u, ou te faasino atu le tagata ua outou sailia.

Ua oo atu i luma o le maota o le tupu o Isaraelu ona toe tatalo foi lea o Elisaia, e faapupula mata o le au tau a Suria. Ua pupula o latou mata, ona latou iloa ai lea ua latou i totonu o Samaria. Ua iloa e le tupu o Isaraelu, ona ia fesili lea ia Elisaia, pe o le a ia fasi ma faauma ia i

latou. Ua fai atu le perofeta, ina ia aua, auā na te le'i faatoilaloina i latou. Ae ia e avane ni meaai e fafaga ai i latou ma toe tu'uina atu e toe fo'i i lo latou alii.

Ua fafaga i meaai e tele ona toe foi ai lea ma le filemu. Na omai le au Suria i le fia tau, ae fo'i ma le maona. Sa tatau ia Elisaia ma le nuu o Isaraelu ona o latou fasi i le au Suria, ona o le mana'o o Suria, ina ia faatoilaloina Isaraelu uma. Peita'i, o faiga ia faa-le-Atua, e tau atu le agaleaga mai, i le alofa.

**GALUEGA FAATINO: TALI I LE SA'O POO LE SESĒ**

1. Sa sii taua Suria ia Isaraelu. (sa'o)
2. Sa faatoilalo e Suria Isaraelu. (sesē)
3. E le'i taunuu le mana'o o Suria, ona o le auauna a le Atua. (sa'o)
4. Sa mana'o le tupu o Isaraelu ma le nuu atoa, ina ia tau i le agaleaga o Suria. (sa'o)
5. Na fasi e le au tau a Isaraelu le au tau na o atu a Suria. (sesē)

**PESE:** fati: Daddy finger

Filemu, filemu, aua le ita  
O Iesu, o Iesu, e lavea'i maia  
Agalelei, agalelei, aua le taumasui  
Ia alofa, ia alofa, le Atua e puipui

**A'OA'OGA:**

1. Aua le ola tauimasui
2. Faalogo i auauna a le Atua e manuia ai.

.....

**ASO SA: 19 IUNI 2022**

**MATAUPU: E FA'AAOGAINA E LE ATUA SOO SE TAGATA**

**SINI:** Ia malamalama le vasega i le tagata e igoa ia Konelio, faatasi ma lona faaaogaina e le Alii.

**TUSI FAITAU:** Galuega 10:1-8

**FESOASOANI MO FAIAOGA:**

O Konelio, o le ta'ita'i o le to'aselau o le au a Italia. Peita'i o Italia, o lona laumua, o Roma. Ua lava lea faamaoniga tatou te iloa ma mnino ai, o le tagata e igoa ia Konelio, o le ta'ita'i au a le malo o Roma, i le vaitau o le tau amata o le ulua'i Ekalesia Kerisiano i le lalolagi. O ia o se tagata sa mata'u i le Atua. E mafua ona mata'u le tagata i le Atua, ona ua talitonu ma le faamaoni i ai. O Konelio foi e aofia uma ai o ia ma lona aiga, i le fiafia e tatalo i le Atua i aso uma.

O lona tulaga i totonu o le sosaiete o tagata o le malo, e maua lea leaga o ia o le ta'ita'i au. Peita'i, sa le avea lona tulaga i totonu o le malo, e toe suia ai lona talitonu i le talalelei ia Iesu Keriso, o ia faatasi ma lona aiga. O le tagata e amio Atua. O loo matuā manino mai foi i le tala i lona faamatalaina, le faaaogaina o lona tagata e le Alii, e auala atu ai le feau o loo ia finagalo i ai. O le feau e fia oo i Iopa, ina ia aami Simona Peteru o loo i ai. Sa le'i toe faatali Konelio, i lona auina atu lea o tagata e to'atolu i Iopa, e tusa o le finagalo o le Alii. O le usita'i o Konelio, ona ua ia talitonu i lē e ana le feau, o le Atua lea. Peita'i o le siosiomaga o Konelio, o ia o le tagata o nuu ese. Ua faaaogaina e



le Atua, ona o ia o le tagata talitonu faamaoni ia te Ia. Ua lē afaina ai poo ia o se Iutaia poo se tagata ese, auā o le tulafono i le va faa-le-tagata, e lē feagai se Iutaia ma se tagata o nuu ese.

E fesoota'i le Atua i le tagata e mafuta atu ia te Ia. O Ia foi e na te filifilia ana auauna o e loto atu ia te Ia, ina ia fai ma ave feau i soo se mea. O le faamoemoe o le Atua i le vaitau o le faasalalauina o le talalelei i le lalolagi, aemaise le vaitau o le ulua'i Ekalesia, ma le tau sailia o tagata latou te molimau i le talalelei ia Iesu Keriso, ua fai ai Konelio ma lona aiga ma ana auauna, o nisi o le au Kerisiano, ina ua latou talia le talalelei ia Iesu Keriso.

E ui o Konelio o le ta'ita'i o le to'aselau i le au tau a Italia, ma o ia foi ma lona aiga ma ana auauna, o tagata o nuu ese, ae na lē avea ma ala e aveesea ai le filifiliga a le Atua, ina ia faaoga e auala mai ai lona finagalo i tagata.

#### **GALUEGA FAATINO: TUSIGA TALA PUPUU**

Tufa ni pepa i le vasega, e na te tusi mai ai se tala pupuu o le valaauina o lona tamā poo lona tinā. Pe faiaoga, foma'i, faifaatoaga pe faifaiva etc. A uma ona faitau le tala a le tama poo le teine i luma o le vasega, ona e faamanatu lea i ai, o le valaauina lenā o lona tuaā mai le Atua.

**PESE:** Ua ou filifili e mulimuli ia Iesu.

#### **A'OA'OGA:**

1. E faaaogaina e le Atua tagata uma.
2. Faalogo i le valaau mai a le Alii i soo se feau.

.....

**ASO SA**

**26 Iuni 2022**

**MATAUPU:**

**E LĒ FEAGAI SE FAATAGATA MA LE MAMALU O LE ATUA.**

**SINI:**

Ia malamalama le vasega i le mafuaaga na pa'u ai Takono.

**TUSI FAITAU:**

1 Samuelu 5:1-6

#### **FESOASOANI MO FAIAOGA:**

O Takono, o le isi lea faatagata sa fai ma atua o tagata Filisitia. E tele atua mamate poo atua e leai ni ola, sa tapua'i ai tagata Filisitia, e pei o Takono. O Takono foi, e i ai lava le fale faapitoa sa faatuina ai i totonu o le nuu o Filisitia.

Ina ua faiaina le au tau a Isaraelu ia Filisitia, na o latou ave ai le atolaau a le Atua sa ia Isaraelu, ma tuu i tafatafa o lo latou atua o Takono. Ae manatua foi, o le atolaau a le Atua, o le faailoga o le auai o le Atua ia Isaraelu. E mamalu ma silisiliese, ma e le soona fia ulavale i ai soo se tasi. O le mafuaaga foi lea ua iloga ai i latou e mafai ona o latou fetagofi ma pa'i iai, faapei o le au Sa Levī, o tagata paia. A'o lea ua fao e tagata Filisitia, ma tuu i le fale o loo iai lo latou atua o Takono. O se vaaiga fou i tagata o Filisitia, ina ua usu atu i le tasi o taeao, ae vaaia lo latou atua o Takono o loo pa'u fao i luma o le atolaau a le Atua. Peita'i e leai se tasi sa i totonu o le fale o loo tutu ai Takono. E le gata i lea, ae o le nofoaga foi o loo iai, o totonu o le fale, e le o agi i ai se savili, e mafua ai ona pa'u.

E ui ona e le o ta'ua e le tusi faitau le mafuaaga na pa'u ai, a'o fesili ma mafauauga e tutupu, pe a faafeagai le mamalu o le Atua silisiliese o le Atua soifua, ma atua faatagata mamate o i latou o loo ifo iai. O loo manino lava le tala, na faalua ona pa'u Takono, ina ua toe faatuina

e i latou na tau atu iai. O le pa'u faalua ai o Takono, na malepe ai ina ua motu ese lona ulu, faatasi ma ona tapulima ua motusia uma.

O le fesili o loo tula'i mai, po o le a se mafuaaga ua pa'ū ai takono?" E pei ona faailoa atu, e le o ta'ua e le tusi faitau le mafuaaga na pa'u ai Takono le atua mate o le au Filisitia. Peita'i, e mafai ona o tatou faapea, ua mafua ona pa'u Takono, ina ua feagai ma le mamalu o le Atua, e ala i le atolaau. Ia pe faapea foi, ua mafua lea tulaga, ina ia faailoa i tagata ifo i tupua o Filisitia ma le lalolagi uma, e leai lava se isi atua soifua e mamalu ma silisiliese faapei o Ia, le Atua o Isaraelu, le Atua o lē na faia le lagi ma le lalolagi, se ia oo lava i le tagata, o Ia lea o loo tatou ifo ma tapua'i iai. I le ma lea, e lē feagai lava se faatagata, o se atua mate, ma le mamalu o le Atua silisiliese.

**GALUEGA FAATINO: TUSIGA ATA**

Taumafai e faaata le tala o lenei aso Sa. Tusi mai le ata o le tala sa faamatalaina. Ia manatua, o Takono, o le tupua (atua mate) a Filisitia, a'o le atolaau a le Atua, o le faailoga o le auai o le Atua silisiliese.

**SOLO:**

O takono o le tupua ulupoo a Filisitia  
Tutū e lē minoi, pefua ma sautia  
Pa'ū faalua i lalo ma salalau i le mutia  
Ina ua faafesaga'i ma le Atua silisiliese ma mata'utia  
Talofa e ia Filisitia ma lo latou atua  
Ua malepelepe solo ina ua pa'ū faalua  
E leaga le olaga o le ifo i tupua  
E pa'ū i lalo ma gau le ua, leai se faalua

**A'OA'OGA:**

1. E na o le to'atasi le Atua soifua.
2. Aua tatou te ifo i tupua.

.....

**MANATU TA'IALA O IULAI: O LE PULE AOA O A LE ATUA**

Ua a'oa'o ina i tatou uma i le pule aoao a le Atua. E lē mafaia e se tasi i le lagi ma le lalolagi ona ia faatoilaloina ma na te faaumatia le pule aoao a le Atua, auā o le pule e mamalu, e mata'utia, e silisiliese, e faavavau lava.

**ASO SA: 03 IULAI 2022**

**MATAUPU: E LEAI SE MEA E FAIGATA I LE ATUA**

**SINI:** Ia malamalama le vasega, o soo se mea faigata e feagai ma le tagata, e lē faigatā i le Atua.

**TUSI FAITAU:** Kenese 18:8-19

**FESOASOANI MO FAIAOGA:**

O le tasi aso i le aoauli, a'o nofonono le toeaina o Aperaamo i lona fale, na ia iloa ai ni tagata se to'atolu o loo tutu mai ia te ia. Ona ia momo'e lea ma faaafē ia te'i latou i lona fale. O nei tagata, o ni agelu a le Atua. Sa faatino e Aperaamo le talimalo lelei i nei tagata, ina ua ia tapena le meaai lelei ma aai ai ma nei tagata e to'atolu ua afea lo latou aiga.

E lei silafia e Aperaamo nei tagata ua afea lona aiga. Ae o le faafeiloa'i atu a Aperaamo ia'i latou e ala i lona ifo toele, ma lana augani ina ia mulumuluina e ia ma lona aiga o vae o i latou ia, faatasi ai ma se taumafataga e tapena e ia ma lona aiga mo nei tagata, ua lava lea e manino mai ai le manatu ma le lagona o le toeaina o Aperaamo, ina ia faamanuia mai le Atua ia te ia ma lona aiga.

O lea lava na taunuu le mana'o o Aperaamo, ina ia faatino se auaunaga a'o se talimalo i tagata ua afea lona aiga. Ina ua uma ona aai o nei tagata, ona o latou faamanuia lea ia Aperaamo ma lona aiga.

Ua fesili foi nei tagata poo fea lana avā o Sara, ma ua faamanuia i ai, e ala i le fanauina lea e Sara o se tama tane mai i lona manava. Na lagona e Sara le tala ua aumai, ma ose faamanuiaga mo lo laua aiga. Peita’i, o le oo mai o le feau ia Aperamo ma Sara, na tuufesili ai manatu ma lagona o Sara, ona ua matutua lo la soifua ma Aperamo. Ma o le ala lea o le ataata ai o Sara, ona o le tulaga lē mautonu ua faateia ai o ia. E le’i lilo i le silafaga a le Atua le ataata a Sara. O le ala lea o le fesili atu o le Alii ia Aperamo, po o le a le mea ua ataata ai Sara. Ua galo ia Sara, e leai se mea e faigata i le Atua. O le Atua fai vavega, o le Atua silisiliese e pule aoao i mea uma lava e oo lava i le soifua ma le ola o le tagata. O le Atua lea, e leai lava se mea faigata i le lagi ma le lalolagi, e lē mafaia e le Atua. Po o le a lava le matutua o Aperamo ma Sara, e mafai lava ona o la fanauina se fanau, i le pule a le Atua.

Na tula’i nei tagata a toe fo’i, a ua ta’u i ai e le Atua i ana agelu, le folafolaga mo Aperamo, o le a fai o ia ma tupuga o le nuu tele.

**GALUEGA FAATINO: FAATINO LE TALA**

E manaia pe a faatino le tala, e saga faamanino atili ai le mataupu o lenei aso Sa. Fesoasoani lau susuga i le faiaoga i le faatulagaina o le faatinoga a le fanau.

**PESE:** E leai se mea e faigata pe ā faatuatua i le Atua  
*(There’s nothing impossible)*

**A’OA’OGA:**

1. O le Atua e puleaoao i mea uma lava e oo lava i le ola o le tagata.
2. Ia tumau le talitonu i le Atua, e foa’i mai ai manuia.

.....

**ASO SA: 10 IULAI 2022**

**MATAUPU: UA FAAOSOOSINA IESU E SATANI I LE MEAAI**

**SINI:** Ia malamalama le vasega, e le na o meaai e ola ai le tagata.

**TUSI FAITAU:** Mataio 4:1-4

**FESOASOANI MO FAIAOGA:**

O le meaai, o se tasi o vaega moomia mo le ola o le tagata. E telē lona tāua ma lona aoga i le tagata. O se vaega moomia (need) o le tagata soifua, e faaauuina ai le ola. E fesoasoani i le malosi o le tino o le tagata, e faaauau ai feau ua valaauina ai.

Ae o le faaosoosoina o le Alii o Iesu, o se taumafaiga na finau ai le alii o le lalolagi poo Satani, ina ia taofia mai ai Iesu mo le faatinoina o lana galuega na Ia afio mai ai i le lalolagi. E le gata i lea, ae ua avea ose taumafaiga ina ia toilalo ai le Alii o Iesu

O le mataupu lava la o lenei Aso Sa, o loo faamamafa lava i le faaosoosoga muamua o Iesu, e pei ona faaogaina ai le “meaai”.

Ua iloa lelei e le tiapolo, ua fasefulu Aso e le’i tausami le Alii o Iesu. Ma ua lagona foi e Iesu lona fia ai. O le ala tonu lea na tofotofa ai e le tiapolo le Alii o Iesu, ina ua fai atu, “afai o oe o le Alo o le Atua ina fetalai ane ia i lenei maa ia liu areto”. O le manatu o le tiapolo, e faamoemoe le Alii o Iesu i le meaai e ola ai. E le gata i lea, ae o loo iloa lelei foi e le tiapolo, o le meaai, ua tele ina faaseseina ai le to’atele o tagata, ma ua sese ai faaiuga fai a le to’atele o tagata.

O le tali mai a Iesu i le tiapolo, o loo matuā manino mai ai lona manumalo i le faaosoosoga muamua. “E le na o meaai e ola ai le tagata ao afioga uma e tulei mai le fofoga o le Atua” o lona uiga i le finagalo o Iesu, e sa’o e ola le tagata i le meaai, ae ao ona faamuamua meaai faa-le-Agaga o afioga a le Atua. O le ola o le tagata, ia aua lava nei faamamafa i le meaai. To’atele nisi o tagata ua atua po ua faamuamua i le sailiga o le meaai e faamalieina ai, a ua galo le Alii o le meaai sili e ola manuia ai. Peita’i o le tala i lenei Aso Sa, o loo faamanatu mai ai, ina ia aua lava le faaseseina gofie, pe faaosoosoina gofie lo tatou ola i meaai, ae mafai e le faatuatua ma le faamoemoe i le mana o le Atua soifua, e na te fafagaina lo tatou ola faa-le-Agaga i Aso uma.

**GALUEGA FAATINO: TUSIGA SOLO**

Tusi mai se solo e faaogaina ai le mataupu o lenei aso Sa. Pule lava le tagata i le mea ua mafaia. Faata’ita’iga:

1. Iesu ua aveina i le togāvaio  
Se’i fetau ma Satani poo ai e sao  
Talofa e ia Iesu ua vaivai  
Ua fa sefulu aso e le’i pa’i lava i se meaai
2. Ataata Satani ua maua le togafiti  
Ma lona faamaualuga o ia o le a sifi  
Iloa lelei lava e Satani o Iesu ua vaivai  
Ua moomia lava e Ia se meaai
3. “Ua ou iloa Iesu ua e vaivai  
Afai o oe o le Alo o le Matai

Se’i e faaliu areto maa nei e fai ma au meaai”  
Tali Iesu, “e lē na o meaai e ola ai”

**PESE:** Lo’u Atua e, ua ou fia ai ia e fafaga ia te a’u.

**AOAOGA:**

1. Aua le tau faaosooso leaga i le isi tagata.
2. E lelei le meaai, ae leaga le na’omeaai.
3. O Iesu le meaai ola, e ola ai le tagata faatuatua.

.....

**ASO SA: 17 IULAI 2022**

**MATAUPU: AUA LE MANATU FAAPITO**

**SINI:** Ia malamalama le vasega ina e lē o se mea lelei le manatu faapito.

**TUSI FAITAU:** 1 Samuelu 30: 21 - 25

**FESOASOANI MO FAIAOGA:**

Ua foi mai Tavita ma ona tagata na faamalolosi e tuliloa Amaleka ua latou faoa a latou mea uma, ma ave o latou tagata. Ua toe maua mai mea uma, atoa ma mea a Amaleka ua latou faoa. Ua manatu Tavita, ana le seanoa le Atua na auai ma i latou, e lē manuia lo latou taumafai e lavea’i mai o latou tagata ma a latou mea totino.

Na i ai tagata na faavaivai i le palaai, na lē mafai ona faamalosi e o ma Tavita. E ono selau le autau na filifilia, na o ma Tavita. Peita'i ane, ua alu le osofa'iga, ma ua nonofo ai le isi to'alua selau o tagata palaai i le alia o Pesora, ae faauau na o le fa selau faatasi ma Tavita. Sa tele le tamāoaiga na fo'i mai ma Tavita ma le to'afa selau. O lea na finau ai i latou na o ma Tavita i le tuliloaga o Amaleka, ina ia aua ne'i faasoa atua mea ua maua ia te i latou na faavaivai ma palaai. Tau lava o le fo'i o le tagata e ta'ita'i lona toalua ma lana fanau ma fo'i io latou aiga, ae aua le avatua i ai le oa.

Sa fai atu Tavita, *“Ou uso e, aua le faapena ona fai i mea ua foa'i mai e le Alii iā te i tatou. Ma na leoleo iā te'i tatou, ma tuuina mai i o tatou lima le au na o mai iā te'i tatou”*. O le manatu o Tavita, e tutusa le vaegāoa o lē na alu ifo i le taua ma le vaegāoa a lē na faamuli i oa. E laugatasia uma tagata uma i le faasoa, tusa lava pe na faavaivai. O lagona o i latou na tigaina, o se manatu faapito. Ua faia le galuega ma le favaavaai solo, i le manatu o ia ua tigaina, a'o le isi tagata e lē o tigaina. Peita'i, ua lē o le manatu lea o Tavita. E ao lava ona tufa tutusa mea uma i tagata na o, ma i latou na faavaivai.

Ua fai foi ma tulafono ia Isaraelu e oo mai i le aso nei, le faasoa ua faia e Tavita. E talitonu foi le lagona, o le finagalo foi lea o le Atua. Ua masani le olaga o le tagata i le faaupuga faapea, *“A lē faipopo, e lē ai pe'epe'e”*. O se lagona e manatu faapito, ona o le manatu i le tigaina ma le malosia ua alu. Peita'i, ua a'oa'oa mai le tala o lena aso, ina ia faamamao o tatou manatu ma lagona faapea, ae ia iloa ona maua le loto maualalo e faamagalō ai, ma ia sili ai le alofa atu, nai lo le manatu faapito ma le aiuū. E iloa gofie le faasoa a le tagata alofa. O le tagata ua faalogo ma usita'i i le Atua, e faia lava mea sili mo isi tagata ma viia le Atua.

#### **UIGA O UPU:**

vete - o mea ua faoa mai i le isi itutaua.

vaegaoa - vaega o tupe ma oloa na maua.

#### **GALUEGA FAATINO: FINAUGA (debate)**

Vavae le vasega i ni vaega se lua. E ioe le isi vaega, ae tetee le isi vaega. O le isi vaega, o tagata na o i le taua, a'o le isi vaega o i latou na palaai. E finau poo ai e tatau ona maua sana vaegaoa a'o e lē tatau ona maua.

**PESE:** Alofa o se mea ou te faasoa atu Love is something that you give it away.

#### **A'OA'OGA:**

1. Aua le ola manatu faapito.
2. Tagata o le Atua e le galue fia ai.

.....

**ASO SA: 24 IULAI 2022**

**MATAUPU: O LE FOA'I UA FAI MO IESU**

**SINI:** Ia malamalama le vasega i le tāua ma le taugata o le foa'i ua faia mo le Alii o Iesu.

**TUSI FAITAU:** Ioane 12:1-8.

#### **FESOASOANI MO FAIAOGA:**

O le foa'i, o se mea ua e ofoina atu mo le isi tagata. Ua masani o tatou aiga ma o tatou matua, e foa'i meaalofa mo le faifeau, faapei o tupe o

meaai ma isi. E mafua ona foa'i, ina ua talitonu le loto ma le mafaufau, o mea e foa'i atu, o le faitaulaga lava lea i le Atua, faapei ona talitonu i ai o tatou matua. E foa'i atu ma le loto atoa, faatasi ma le maumautino, e faamanuia mai ai le Atua.

O le foa'i o loo faamatalaina i le tala o lenei taeao, o le foa'i a le fafine mo le Alii o Iesu. Ua lē o se tupe poo ni meaai, ua na ose uu nato, ia poo se fagu faamanogi e pei ona masani ai i tatou. E eseese ituaiga u'u manogi faapei o fagu, ma isi. Peita'i o le uu o loo faaaogaina i le tala o lenei aso Sa, e faamatalaina o le faamanogi (perfume). E faaaogaina e faamanogi ai le tino, ina ia tosina ma fiafia ai nisi tagata latou te faalogoina se manogi manaia. E ui la i le eseese o u'u manogi ma o latou sasala, peita'i o le u'u manogi o loo iai le mataupu o lenei Aso Sa, e pei ona fai ma foa'i mo Iesu, o se u'u ua uiga ese lona sasala i lona manogi. E le o faamatalaina lea tulaga i le tala ma le tusi faitau. Peita'i, e mafai ona iloa ma faamatalaina lenei u'u manogi i lona manogi uiga ese ma lona sasala, pe a fua i le manatu o Iuta le soo faalata, ose u'u e ese lona taugatā. A taugatā se oloa, o iina o loo ta'u mai ai le tulaga (quality) o le na oloa. O lona uiga afai e manatu le au soo, o le u'u taugatā, e leitioa foi la a manumanu, ina ua sasa'a e Maria e mulumulu ai vae o Iesu. Leaga o le u'u e taugatā lona tau, ona o lona manogi.

Ae mo Maria lava ia, ua ia manatu ina ia foa'i ma faaaoga mo lona Alii o Iesu. O se faiga o loo atagia mai ai le tagata ua ia ave ma foa'i mea sili mo lona Alii. E mafai foi ona faapea, o le foa'i ua faia e Maria e ala i le u'u manogi na ia foa'i mo Iesu, ma le soloia o vae o Iesu i ona laulu, o lana taulaga lava lea i le Atua.

O mea tāua ma taugatā i so tatou manatu, o mea ia e tataua ona o tatou faaaoga mo le finagalo o lo tatou Alii. Tatou te le o mafuta ma le Alii

i le vaaiga o mata. Ae mafai ona o tatou iloa i o tatou mata, ina ua o tatou foa'i mo le manuia o nisi o loo fia maua se fesoasoani. Auā na fetalai le Alii, o sē aupito faatauavaa ua e faia i ai ma foa'i i ai se mea lelei, o Ia lava lenā.

#### **UIGA O UPU:**

uu nato tau tele – o se fagu faamanogi taugata  
tenari - tupe

#### **GALUEGA FAATINO: FAATINO LE TALA**

O tala nei o tala e faatino soo i totonu o Aoga aso Sa. Ua faalogo soo foi i ai le fanau, ma ua masani foi le vaai i faatinoga. E lelei ona faatino le tala.

**PESE:** A tumau ia Iesu (When we walk with the Lord)

#### **A'OA'OGA:**

1. Ia faatino le auaunaga mo le Alii e ala i le usita'i.
2. Aua le aiu e foa'i mo le Alii

.....

**ASO SA:** 31 IULAI 2022

**MATAUPU:** UA LAVEA'I E MOSE LE FANAU A LE OSITAULAGA MITIANA

**SINI:** Ia malamalama le vasega i le galuega fesoasoani a Mose i le fanau a le ositaulaga.

**TUSI FAITAU:** Esoto 2:11-19

**FESOASOANI MO FAIAOGA:**

Ua iloa e Mose o loo fia fasioti le tupu o Farao ia te ia, talu lona fasiina o le tagata Aikupito ma nanā i le eleele, ina ua ia (tagata Aikupito) soona sauā ma fasi le tagata Eperu, a'o mamafa lana avega. Sa tonu ai loa i le manatu o Mose, e tataua ona sola ese, mai le ita o le tupu o Farao.

Ua sola ese Mose, ma aga atu i Mitiana. Sa nofo Mose i se vaega o eleele o le nuu o Mitiana, i tafatafa ane o le vaieli. A'o le vaieli lea, e fai mo tagata fai lafumanu e faafeinu ai a latou manu e pei o povi, o asini, o mamoe, ma isi manu faapena.

O le tasi o aso, na o ane ai afafine e to'afitu a le ositaulaga Mitiana, e utu a latou vai ma faafeinu le lafumanu a lo latou tamā i le vai eli. Na faate'ia nei tama'ita'i i le osofa'i atu o isi leoleo mamoe, ma tutuli ese i latou mai le vaieli. A o le nofoaga tonu lava lea o lo o nofonofo ai Mose ma malolo ai. Sa tupu a'e i le lotu o Mose lona fia fesoasoani atu e lavea'i i tama'ita'i, ona o le faamaualuluga ma le fia malolosi o ia leoleo mamoe. O le mafuaaga lena o lona tamō'e atu loa, ma lavea'i nei tama'ita'i, ina ua ia tutuli ese isi leoleo mamoe fia malolosi. E le

gata i lea, a ua fesoasoani foi e faafeinu mamoe na o atu ma tama'ita'i. Ua fiafia nei tama'ita'i, ma fo'i atu i lo latou aiga.

O le galuega ua faia e Mose i le va o nei leoleo mamoe faamaualuluga ma le fanau a le ositaulaga Mitiana, o lana galuega foi lea na faia i le va o tagata Isaraelu e to'alua, lea na toe vevesi lava laua i totonu o Aikupito. O le vaovao misa, e faatupu le filemu i le va o tagata, ae sili ai ina ua laveaiina ai le ola o le fanau teine a le ositaulaga Mitiaga, e pei ona faia i luga o le vaieli.

**GALUEGA FAATINO:** TUSIGA ATA

Faamatala atili le tala, i le taumafai e tusi le ata o le tala sa faamatalaina. Ia vavae le vasega i ni vaega se lua ona tusi lea o le ata. Ia tuu le avanoa i vaega e faamatala le ata na tusiaina.

**SIVA TAU:** Faataga le siva tau.

O Mose o le tama lotu toa toe masoa  
Leai se isi toa o le vasa loloa  
Tutuli ese isi tagata fia iloa  
Leai se palaai, tama'itai ua iloa, Hi!

**A'OA'OGA:**

1. Loto fesoasoani ina ia faasaoina ai nisi tagata.
2. Aua le ola fia malosi, ae lotu mauualalo.

.....

**MANATU TA’IALA O AOKUSO: O LE ATUA AUAI**

O le silafaga a le Atua, e ati i soo se mea lava. E siliafia e le Atua mea uma lava, e oo lava foi i le loto o le tagata. O le faailoga lea o le auai o le Atua i soo se mea, ma faafogaina le tagi atu o le loto o le tagata. E iloa le tagata e uo ma le Atua i lana amio o aso uma, ona o le auai o le Atua.

**ASO SA: 7 AOKUSO 2022**

**MATAUPU: AUA LE MANA’O TELE.**

**SINI:** Ia malamalama le vasega, e lē o se mea lelei le mana’o tele.

**TUSI FAITAU:** 1 Tupu 21:1-16.

**FESOASOANI MO FAIAOGA:**

O le tagata e igoa ia Napota, o le Isereelu. Sa i ai lona fasi fanua e latalata ane i le fanua o Aapo le tupu o Isaraelu. O le mea ua tupu, ua mana’o le tupu o Aapo i le fanua o Napota. O le ala lea na ia faatauina ai Napota mo le fia faatauina o lona fanua i ni tupe, pe faafesuia’i ma se tasi o fanua o le tupu. Peita’i ua lē mana’o ai le alii o Napota, ona o lona lea faasinomaga, ma le faasinomaga o ona tamā ua mavae. O lona lea tofi mai ona tuaā ua mavae atu. O le tali atu a Napota i le tupu o Aapo, na avea ose tiga tele i le loto o le tupu.

Ua iloa e Iesepela le to’alua leaga o le tupu, ona ia taupulepule lea ose mafuaaga tata, ina ia oo ai le oti ia Napota, ae se’i fai mo le tupu le fanua o Napota. O le ala lea ua ia faaososo ai toeaiina o le nuu, ina ia faamasino ia Napota. Na taunuu lava le togafiti ua faia, ma ua aumai ai Napota ma ona atalii i tuapā o le nuu, ma fetogi i maa, ma foeti ai.

Ua iloa e Aapo le tupu ua oti Napota, ona ia ave lea o le fanua o Napota e fai mona, e tusa o lona mana’o.

Peita’i, e le’i sao i le silafaga a le Atua le mea leaga ua faia e Aapo ma lona to’alua o Iesepela. O le ala lea na poloa’i ai i lana auaua o Elia, ina ia logo Aapo, o le mea na ia faia ia Napota, e faia foi ia te ia i le lumana’i, ma o le leaga foi, e faasolo atu i lona aiga ma e tutupu mai ai.

O le mana’o fua i le meatotino a le isi, e tupu ai le agasala i le loto, ma oo ai i isi auala sese, e pei o le mea ua faia e Aapo ma lona to’alua o Iesepela. O le ave foi ose meatotino a se tagata i se auala piopio, ose faiga ua manatu ai le tagata i lona lava loto faamalieina, ae galo ai le silafaga ati a le Atua. O le mea ua mautinoa, o Aapo o le tupu o Isaraelu. O le tagata e tele ona tamāoaiga, e le gata i tupe o aurio ma auro, ae faapea foi i fanua. Pe lē lava ea ia oa ma le tamāoaiga e faamalieina ai? O le loto lava ua lē faamalieina, ona ua maua luga le mana’otele, ma ua leai ai ma se alofa. E leaga le mana’o tele.

**GALUEGA FAATINO: TALIGA FESILI**

Tali i fesili ua tuuina atu i lalo.

1. O ai Napota?  
Tali: O le Isereelu.
2. O ai Aapo?  
Tali: Tupu o Isaraelu
3. O le a le mana’o o Aapo?  
Tali: Mana’o i le tovine a Napota.
4. O le a le tovine?  
Tali: Fanua.
5. O ai na faia le togafiti e oti ai Napota?  
Tali: O Iesepela le to’alua o Aapo.
6. O le a le mea na tupu?  
Tali: (faamatala)



**PESE:** *fati: Le Ekalesia*

O le mana’o tele, ose uiga e leaga tele  
Mana’oga o le loto le mafai ona tetee  
Ia alo 33loe se, le ola ia faaeteete  
Taumafai ia poto le mana’o ina ia sefe

Tali: Ia fua le mana’o, i mea ua e maua  
Le Atua na te faa---nate faasoa maia  
Ae lē o le mana’o i le malaia  
Le Atua o loo foa’i maia  
E malie ai le loto, i mea uma ua e faia

**AOAOGA:**

1. Aua le mana’o tele, ae fua i mea ua foa’i mai e le Atua i lea Aso ma lea Aso.
  2. E leaga lou faoa ose meatotino a se tasi i se auala sese.
- .....

**ASO SA:** 14 Aokuso 2022

**MATAUPU:** O LE PEPELO O ANANIA MA SAFAIRA.

**SINI:** Ia malamalama le vasega e lē fiafia le Alii i le ola pepelo.

**TUSI FAITAU:** Galuega 5:1 – 11

**FESOASOANI MO FAIAOGA:**

O Anania ma Safaira, o se ulugalii i le taimi o le ulua’i Ekalesia. O i laua uma e nonofo i Ierusalem. O le vaitau lea sa tele ai o latou fanua ma fale, faatasi ma nisi tagata. O le toatele o isi tagata ua o latou faatau atu o latou fanua ma fale, ona maua mai lea o tupe ma tuuina atu i le au aposetolo, auā le atina’eina o le Ekalesia Kerisiano po o le lotu. Sa i ai foi la le fanua o Anania ma Safaira, na o la’ua faatau atu. O le mea ua tupu, ua maua mai le tupe, ma ua le ave uma e tusa o le ta’utinoga ua uma ona fai, i le ave uma lea o le tupe e maua, auā le atina’eina o le Ekalesia. Ua ave le isi vaega o le tupe, ae ua tuu ia’i laua le isi vaega tupe.

O le itu sa sili ona lē lelei, o le pepelo o Anania, mulimuli ane ua sau foi lana avā o Safaira, ua faapena foi ona pepelo o ia. Sa fesili muamua Peteru i le tamāloa o Anania, ae pepelo. Ona oti ai lea o ia. Ua mavae atu nai itula e tolu talu ona maliu Anania ae sau lona to’alua o Safaira, toe fesili atu i ai Peteru ae pepelo foi, ma iu ai ina oti ai foi ma ia.

E mafai ona faamatala Anania ma Safaira, o se ulugalii ua faalogo ma iloa le talalelei, a’o le loto ma le faatinoga, e lē o atoatoa. Ua pepelo i luma o tagata, ae sili ai le silafaga a le Atua. E toatele tagata e faapena i le olaga nei. E fiafia e pepelo, ma le manatu e faasaoina ai. O nisi o tagata, ua pepelo lava ma le iloa.

E to’atele lava tamaiti e faapea o latou uiga. Ua a’oa’o mai lenei mataupu, i le lē lelei o lea amioga ona tatou faia. E moomia le ta’utino,

ma faatino. Po o le folafola ma taumafai ina ia taunuu, ae aua le ola pepelo.

**GALUEGA FAATINO: TUSIGA RIPOTI**

Tusi mai ni parakalafa pupuu e toe faamatalaina ai le tala sa faamatalaina. Ia foliga o se ripoti o le mea moni na vaai i ai. A faalogo i le au fai talafou o televise, e maua mai ai le metotia e tusi mai ai le ripoti.

**PESE:** (fati: O Iesu le uo a tamaiti)

O Anania ma Safaira e leaga, (e leaga x2)  
O Anania ma Safaira e leaga, Ioe, Ioe e moni.

Ua pepelo i laua uma, (i laua uma x2)  
Ua pepelo i laua uma, Ioe, Ioe e moni.

**A’OA’OGA:**

1. Aua le ola pepelo faapei o Anania ma Safaira.
2. Ia foa’i i le Alii ma le loto atoa.

.....

**ASO SA: 21 Aokuso 2022**

**MATAUPU: O LE MAUOA MA LE TAGATA MATIVA**

**SINI:** Ia malamalama le vasega, e tāua le alofa atu i le tagata mativa.

**TUSI FAITAU:** Luka 16: 19 - 25

**FESOASOANI MO FAIAOGA:**

O le tala o lenei Aso Sa, o le faataoto a Iesu i le tamalaoa mativa ma le tagata mauoa. O le igoa o le tamalaoa mativa o Lasalo. O Lasalo o le tagata sa ma’i papala. Sa ola i se olaga mativa, a’o i ai i le olaga o aso uma faapei o tatou. O le ala faigata lea o lona olaga sa i ai, ma fia ai solo, ona o ia o le tagata mativa. O le tasi aso, na oo atu ai Lasalo i le fale o le mauoa, ma aisi i ai mo sana meaai. Peita’i, na tuli i fafo ma aai faatasi ma ta’ifau (ulī), i toega meaai a le mauoa. Sa agaleaga le tagata mauoa ia Lasalo, le tagata mativa toe papala. O le ata manino o le vaai maualalo ma le lē amanaia e le tagata mauoa o le tagata vaivai ma le tagata mativa.

Ua oo ina oti Lasalo, ona ave lea o ia e agelu i le fatafata o Aperaamo. O le faailoga o le i ai o Lasalo i le malo o le Atua, o le ola lea e faavavau. Ua oti foi le mauoa, ua ese le mea ua alu i ai o ia. Ua faatasi atu o ia i seoli, le nofoaga o loo mumū ma sasao ai le afi, e faaumatia ai i latou e oo atu i seoli. Ua vaai mamao atu le tagata mauoa ia Lasalo ua i le fatafata o Aperaamo. Ona ia tagi lea ma augani atu mo se fesoasoani, i sina vai se’i faasūsū ai ona o le vevela o le afi i seoli.

Ioe, o le iuga lena o le tagata sa lē alofa ma vaai maualalo i le tagata mativa. Sa saili fesoasoani i ai, ona o le tagata sa telē lona tamaoiga, ma lelei ana meaai sa tausami ai, ae sa ia tuli ia Lasalo le tagata mativa i fafo mai lona fale. O lea ua faafiafiaina Lasalo, ua ia feiloai ma lona

matai, ma ua siosioina o ia e agelu i le ola e faavavau, o le mālo lava lea o le Atua, ae mu i le afi le tagata mauoa.

Ua faamanatu mai lenei faataoto a le Alii o Iesu ia'i tatou, ina ia o tatou alolofa i so o se tasi o fia maua se fesoasoani, ona alofa mai lea o le Atua ia te'i tatou. Aua le vaai i le tele o mea ua o tatou maua, ma ala ua punitia ai lo tatou alolofa i le tagata o lo o fia maua se fesoasoani, a'o tatou i ai i lenei olaga e lē tumau.

**GALUEGA FAATINO: FAAFEAGAI**

Tusi mai uiga faafegai o upu o loo i lalo.

1. mauoa (mativa)
2. alofa (ita, agaleaga, aiū)
3. papala (maloloina, momosi)
4. ola e faavavau (afi i seoli)
5. faasūsū (faamago, faamatūtū)

**PESE:** Alofa ose mea e te faasoa atu.

**A'OA'OGA:**

1. Alofa i le tagata mativa o loo i ou autafa.
2. Faasoa atu i e matitiva.

.....

**ASO SA: 28 Aokuso 2022**

**MATAUPU: UA USITAI SAULO I LONA TAMĀ.**

**SINI:** Ia malamalama le vasega na usita'i Saulo i le faatonuga a lona tamā.

**TUSI FAITAU:** 1 Samuelu 9:1-5

**FESOASOANI MO FAIAOGA:**

O le toaina o Kiso, e sau mai i le isi ituaiga o Isaraelu, o Peniamina. O le tagata e tupuga mai i se aiga mauoa. Sa ia te ia le lafumanu, faatasi ma asini. O le faailoga lea e iloa ai le tagata e lelei lona tamāoiga, ma tu-lelei lona aiga, o le i ai lea o lafumanu ma faatoaga. O lona atalii, o le tama umī toe aulelei, o Saulo lona igoa. Sa sili lona aulelei i tagata uma o le fanauga a Isaraelu i lea vaitau.

O le tasi aso na le iloa ai asini a le toaina o Kiso, ona ia faatonuina ai lea o lona atalii o Saulo, ina ia o ma se taulealea ina ia saili mai asini ma faafoi mai. Sa usita'i le tama o Saulo i le faatonuga a lona tamā, ina ia alu e saili mai asini ua le iloa. O le saili o manu ua le iloa, e le o se galuega e faigofie, ona o le tele o faafitauli e faafeagai, faapei o nisi o manufeai i le vao, aemaise o nisi o tagata faomea ma gaoi e lalafi solo i le togāvao. E lei mafaufau le tama o Saulo i ia faafitauli. Pau lava le mea, o lona usita'i e ala i lona tula'i ma faatino loa le faatonuga a lona tamā. Sa alu le su'ega o asini, ua le gata mai i le mauga o Efaraima, ua oo i le nuu o Salisa, faasolo atu i le nuu o Saali e leai lava. Ua sosoo atu ma le nuu Iemaima, ma faasolo atu i le nuu o Sufi, le su'eina o asini. O le ata manino o le usita'i o le tama o Saulo i le faatonuga, ina ia saili asini ua leiloloa a lona tamā. O le usita'i foi

o Saulo i lona tamā, o loo aliali mai ai le alofa lavea'i o le Atua, i le tagata e faalogo ma usita'i i le faatonuga. Poo a lava faigata, o le mamao ma le lavelave, e finau lava ina ia faataunuu le olaina o le usita'i, ae puipui e aao lavea'i o le Atua.

O le faata'ita'iga lelei tele ua aumai i lenei tala, mo i tatou uma lava. O le a le faatonuga e tuuina mai e o tatou matua ma o tatou ta'ita'i, ia o tatou faalogo ma usita'i, ma faatino i le faamaoni. Pe faigofie pe faigatā, faatino i le mea e gata ai le malosi ma le iloa.

**GALUEGA FAATINO: FAAALIGA O MANATU**

Tuu i le vasega e faaali manatu o le tagata lava ia, e faamatala ai lagona pe a tuuina atu se faatonuga e ona matua e alu e saili mai a latou manu ua leiloa.

**PESE:** Ou te lē faatali se'i o'u matua.

**A'OA'OGA:**

1. Ia ola usiusita'i i o tatou matua.
2. Aua le faalogologo tigā.
3. Ava i matua e manuia ai.

.....

**MANATU TA'IALA MO SETEMA: O LE ATUA FAI TAULAGA**

O le Atua faitaulaga, e mafai ona faamatalaina o le Atua ma lona alofa mai i soo se ala ua ia saunia. O le malosi ma le soifua maua o lea aso ma lea aso, o le taulaga lona poo le alofa faailoa mai o le Atua i lana fanau faatuatua. O le ala fo'i lea e tatau ai ile tagata ona faitaulaga mo le Atua.

**ASO SA: 04 Setema 2022**

**MATAUPU: IA FAI MEA SILI.**

**SINI:** Ia malamalama le vasega o galuega sili ma lelei e te faia ma le faamaoni e fia silasila i ai le Atua.

**TUSI FAITAU:** Kenese 4:1-7

**FESOASOANI MO FAIAOGA:**

O le mea sili tamaiti, o se galuega e pito sili ona lelei e te faatinoina mo le isi tagata mai lou loto lelei ma le agaga faamaoni e fai ai. O le mea sili lona tamaiti e mautinoa e fia silasila i ai le Atua ma e faamanuia mai ai fo'i le Atua ia te i tatou.

O le tala sa faitauina, o le au uso tama e to'alua o Kaino le igoa o le tama matua ma Apelu le igoa o le uso laititi, o la matua o Atamu ma Eva. Na i ai le agalelei o le Atua ma ana faamanuiga i galuega sa atiae a le au uso ia e to'alua, o Kaino o le fai faatoaga ae o Apelu o le fai lafu manu.

Na tupu ma ola le faatoaga a Kaino, ua tele naua, ua lelei ma matua lana faatoaga, ua faapena fo'i le tama o Apelu ua manuia lana lafumanu, ua tele ma pepeti manaia. O le ala lea na tonu ai i o la manatu e tatau ona fai ni a la taulaga e faafetai ai i le Atua ona o le tele o lona agalelei ua faaalua e ala i la galuega.

Ua ta'itasi i laua ma tapena a laua taulaga. O Kaino ua alu i lana faatoaga ma saili mai fua o ana faatoaga e faaoga, peita'i ua ia le saili i fua e sili ona lelei ae ua ia faasao e ave e faatau. Peita'i o le tama o Apelu ua le faapea ona manatu, ua ia saili manu, o ulua'i tama o lana lafu manu e aupito sili ona pepeti ma lelei e osi ai lana taulaga. O le ola fai mea sili lea o Apelu tamaiti na afua ai ona mu lana taulaga, aua ua silasila ifo iai le Atua. O le taulaga ua faia ma le agaga ua faamaoni ma le loto e lelei e ofo mea e silisili ona lelei mo le Atua. Ua mata

fiafia Apelu ona ua talia e le Atua lana taulaga. Peita'i o le tama matua o Kaino ua ita lona loto ma ua faau'u ona mata ona ua le silasila le Atua i lana taulaga.

Tamaiti o le ola faitaulaga i le Atua, e taua le faia ma le faamaoni. Ia ofo le mea sili ona lelei e fai ai lau taulaga faafetai i le Atua. E fiafia le Atua i le tagata na te iloa ona faamuamua o ia ma ofo atu mea e sili mo ia. O le Atua na ia faia fo'i le taulaga sili e ala i le soifua o lona alo pele e to'atasi na ia foa'i mai mo le faamagaloina o a tatou agasala ae o le faaolataga mo le lalolagi uma.

**GALUEGA FAATINO: TUSITUSIGA**

Ia tusi mai ni fuaiupu se tolu e faamatala ai galuega sa faia e Apelu. Ia tusi fo'i nisi fuaiupu se tolu e faamatalaina ai galuega na faia e Kaino.

**PESE:** Pese ma Viiga 368

**AOAOGA:**

1. E silafia e le Atua mea uma
2. E talia e le Atua le taulaga e faamaoni ona tapena mo ia
3. Ia fai mea sili mo le Atua.

.....

**ASO SA: 11 Setema 2022**

**MATAUPU: O LE ATAMAI O IESU**

**SINI:** Ia malamalama le vasega o le atamai o Iesu e silisiliese, e le mafai ona iloa i le potu faaletagata.

**TUSI FAITAU:** Mareko 6:1-13

**FESOASOANI MO FAIAOGA:**

O le atamai tamaiti, e i ai le talitonuga e eseese ma le upu potu. O le atamai i lo'u talitonuga o le meaalofa mai le Atua, ua i ai le faautauta e faatonutonu ai agavaa ma meaalofa ua foa'i mai e le Atua. E lē gaoia, e lē mimita vale ma fiafiao ae na o le fiafia e vivii ma faafetai i le Atua ona o lona agalelei mai. Ae o le potu, o lou iloa e maua mai aoaoga, o le ala lena e taua ai lo tatou toaga i aoga ina ia maua e i tatou le potu. O lona uiga tamaiti e mafai ona maua e tamaiti uma le potu, ae le mafai ona maua uma e tatou le atamai, se'i vagana ua muai tatou fiafia e tatalo ma vivii i le Atua.

O le tatou mataupu na faitauina, o lea ua toe fo'i o Iesu ma ona soo i Nasareta lona nuu. Ae le i taunuu Iesu i Nasareta ua leva ona faalogo tagata o lona nuu i vavega e tele na faia e Iesu. Peita'i ua latou le taliaina. Ua le mafai ona latou talitonu i faamalologa ma vavega na faia e Iesu ona o le latou talitonuga, e le mafai ona faia e Iesu ni vavega ma faamalologa aua o ia o le atalii o le kamuta. E leai sona potu ma se iloa e faamalolo ai ma'i ma faia ai ni vavega. Ua vaai maualalo tagata o lona nuu ia te ia. Ua latou le iloa o Iesu o ia lava o le Atua o loo i ai le atamai silisili e le tutusa ma le iloa faaletagata. O le uiga lena o le fetalaiga a Iesu "E le mamalu se perofeta i lona nuu". O lea ua maluu mai Iesu i lona nuu, ua le talia e tagata o ia. Ua le talitonu o Iesu o le atamai silisili e i ai le mana na te mafaia ona fai ai mea uma.

Tamaiti o le tatou mataupu lena i lenei taeao, o Iesu o le atamai silisili, e le oo iai le poto faaletagata, o vavega ma faamalologa na faia e Iesu e le o se fia iloa po o se mimita ae o le faia o le finagalo o le Atua. O le iai fo'i o i tatou le fanau i aoaoga. e lelei le saili o le poto, ae o le poto e i ai le faautauta ina ia mafai ona tatou iloa le atamai faa-le-Atua, aua e le gaioia, e loto mauualalo ma e faia mea uma mo le viiga o le Atua.

**GALUEGA FAATINO: TUSITUSIGA**

Faama mai fuaiupu i upu o loo avatu. (faatuatua, sunako, Maifea, ofo, perofeta, sapatu.)

Ua oo i le \_\_\_\_\_, ona aoao atu lea o ia i le \_\_\_\_\_.

\_\_\_\_\_ na mau ai e lenei tagata ia mea?

E leai se \_\_\_\_\_ e le mamalu.

Ua \_\_\_\_\_ fo'i o ia i lo latou le faatuatua.

**PESE:**

E sili oe

E sili oe Iesu

Ta fia pei fo'i o oe.

**AOAOGA:**

1. E silisiliese le atamai o le Atua
2. E mafaia e le atamai o Iesu ona faia mea uma

.....

**ASO SA: 18 Setema 2022**

**MATAUPU: E LEAGA LE OLA FAAMAUALUGA.**

**SINI:** Ia malamalama le vasega e le fiafia le Atua i le tagata e ola faamaualuga.

**TUSI FAITAU:** Tanielu 4: 28-33

**FESOASOANI MO FAIAOGA:**

O le ola faamaualuga tamaiti, e le o se amio e lelei, e le fiafia i ai Iesu, aua fo'i a ola faamaualuga le tagata, o lona uiga e le iloa ona ava i isi tagata pe le usita'i fo'i i ona matua. E ola fia sili ma vaai mauualalo i isi tagata. E manatu faapito, ma e mautinoa na te le iloa fo'i le Atua. E manatu o lona lava poto ma le malosi e na te mafaia ai mea uma. E le iloa vivii ma faafetai i le Atua.

O le tala sa tatou faitauina o loo faamatalaina ai le tupu o Papelonia e igoa ia Nepukanesa. O le malo o Papelonia i lea vaiata, o le malo e malosi ma ua mautu lona tamaoiga. Sa ia pulea uma malo o le lalolagi i ia ona po. E malosi i le itu faafitafita, tele fale mananaia ma lelei lona atina'e.

O le tulaga mauualuga lea ma le malosi o le malo o Papelonia ua fai ma ala ua faamaualuga ai Nepukanesa le tupu. Aua fo'i ua le faatusaina lona malo i se isi lava malo o le lalolagi. O le ala lea o le fiafia ma mimita vale solo ai le tupu ma faapea ane, o lona malosi ma lona poto ua mafua ai ona malosi ma mautu le malo o Papelonia. Ua faapea ifo le tupu, e le o Papelonia tele ea lenei na ia fausia i lona malosi. Ua galo ia Nepukanesa le Atua. O le ala lea ua le fiafia ai le Atua, aua ua faamaualuga le loto o Nepukanesa ae ua le iloa ona faafetai. Ua te'i le tupu i le siufofoga o le Atua ua faapea mai "Nepukanesa le tupu e, ou te fai atu nei ia te oe, ua te'a ma oe le malo". Ua aveeseina le tulaga tupu na ia Nepukanesa. Ua sola manatu

faamaualuga ina ua aapa mai le Atua ma fai le tau i o le tagata e le iloa ona vivii i le Atua. Ua tuliese mai i le nofoaga o tagata ae ua ola pei o se manu e ai i le vao.

Tamaiti o le tau i lona o le tagata e ola faamaualuga, e aumai lava e le Atua i le tulaga maualuga sa iai aai faatasi ma mea ola poo manu. O le iuga lona o le tagata e le iloa faafetai i le Atua. Ua avea le tele o le tamaoiga ua faamaualuga ai ae ua le vivii i le Atua.

### **GALUEGA FAATINO: TALIGA FESILI**

O ai Nepukanesa?

Aisea na faamaualuga ai Nepukanesa?

O le a le iuga na oo ia Nepukanesa?

O le a le tau e maua e le tagata na te le iloa le Atua?

**PESE:** O le Atua e mata'utia

### **AOAOGA:**

1. E leaga le ola faamaualuga.
  2. Ia iloa ona faafetai i le Atua
  3. O le Atua o le tupu silisili.
- .....

**ASO SA: 25 Setema 2022**

**MATAUPU: MALAGA FAATASI MA IESU**

**SINI:** Ia malamalama le vasega o Iesu o le ta'ita'i malaga sili e le mafai ona ia tulafoa'i i lana fanau.

**TUSI FAITAU:** Mataio 14:22-27

### **FESOASOANI MO FAIAOGA:**

O lo tatou i ai i le olaga nei, e mafai ona faamatalaina o se faigamalaga. O nisi o taimi tatou te malaga i le lelei o le tau, ae o nisi fo'i o taimi tatou te ui ai i le sousou, i le tele o faafitauli ma mea e tutupu i le olaga. Peita'i e ao ina ia mautinoa e i tatou le fanau, o loo tatou malaga faatasi ma Iesu, tusa lava poo a mea e tutupu i la tatou malaga, e le mafai ona tuulafoaina i tatou e Iesu.

I le tatou mataupu o lena taeao. Ua faaulutalaina Malaga faatasi ma Iesu. Ua uma ona filifili e Iesu lona ausoo e malaga faatasi ma Ia e tala'i le talalelei. Ua vaavaai fo'i ma molimau le ausoo i nisi o vavega na faia e Iesu i le amataga o le latou mafutaga. Peita'i o loo tumau pea le popole ma le lē mautonu o le ausoo pe a feagai ma faafitauli.


I le tatou mataupu na faitauina, o lea faatoa uma lava ona faia e Iesu le vavega e i ai le fafagaina o le motu o tagata areto e lima ma ia e lua. O le motu o tagata na potopoto atu e molimau ma faalogologo i aoaoga a Iesu. O se vaaiga na molimauina e le ausoo ma ua latou talitonu ai, e leai a se mea e faigata ia Iesu. Ua aai ma le fiafia le motu o tagata na i ai, ua totoe fo'i meaa. Lea la ua sosoo ma le malaga a le ausoo i luga o le vai. Ua fetalai atu Iesu ia te i latou e muamua atu ae se'i maliu ane i le mauga e tatalo i lona Tama.

Ua oo le malaga i le ogatotonu o le vai, ae faafuase'i loa ona oso mai le matagi, ua sou le sami ma ua tauau ina faaleagaina le vaa. Ua fefefe

ma popole le ausoo ua leai so latou faamoemoe. Peita'i ua oo i le itupo e 4 ona faafuase'i lea o na latou vaaia le tagata ua savali ane i luga o le vai. Ua fetalai atu Iesu ia te i latou "ia outou loto tetele, o a'u lava, aua tou te matatau". Ua malu le vasa ma ua faasaoina le vaa ma le ausoo. Ua iloa e le au-soo e sa'o lava o Iesu o le Alo o le Atua. Ioe tamaiti, o le le mautonu ma le popoole vale na iai le ausoo, ona o le malolosi o matagi. Na laveaina lava e Iesu, aua e le mafai ona ia tuulafoa'i i lana ausoo. E faapena fo'i tatou le fanau o fea lava tatou te i ai, o le o i le aoga ma le toe fo'i i aiga i lea aso ma lea aso, ia tatou o ma le mautinoa o loo tatou malaga faatasi ma Iesu. E le mafai ona ia tuulafoaina i tatou o lana fanau.

**GALUEGA FAATINO: AUALA E SAO AI**

O le ata o loo i lalo, e tusi mai ai le ala e sao mai ai i fafo.



**PESE:** Sau ta o ma a'u i le maota o lo'u tama.

**AOAOGA:**

1. E le tu'ulafoaina i tatou e Iesu.
2. O Iesu o le ta'ita'i malaga sili.
3. O Iesu o le pule aoao.

.....

**MANATU TA'IALA MO OKETOPA: O LE ATUA AGALELEI**

O le tatou iai i lenei masina i le alo atu ai o i tatou i le fanau mo le lotu tamaiti. Ia tatou lagona faatasi le agaga faafetai i le Atua ona o lona agalelei i le tausia ma le puipuia o i tatou le fanau i le tele o ala tatou te uia faapea faama'i. Ia tatou tautino faatasi o le Atua, "o le Atua agalelei".

**ASO SA:** 23 Oketopa 2022

**MATAUPU:** UA FAAMAGALO E ESAU LONA USO O IAKOPO.

**SINI:** Ia malamalama le vasega o le loto faamagalo e mafai ona maua ai le filemu ma le nofo lelei ma maua ai le fealofani.

**TUSI FAITAU:** Kenese 33: 1-5



**FESOASOANI MO FAIAOGA:**

O le upu faamagalo tamaiti, e fausia mai le upu magalo. O le faatinoga e faia i le va o ni tagata se to'alua pe sili atu fo'i pe a afai sa misa ma feeseesea'i. O se faatinoga lelei tele auā e mafai ona maua ai le leleiga, fealofani ma toe mafuta fiafia ai lana fanau. O le galuega e faatino e le tagata loto maulalo ma lotomamā.

O Esau ma Iakopo o le fanau a Isaako. O le ulumatua o Esau ma Iakopo o le uii. O le mafutaga sa mafana i le amataga peita'i na fevaevaea'i ina faoa e Iakopo le tofi o le ulumatua mai ia Esau. O lea lava e fealuai solo Iakopo, a e mamafa lava i lona mafaumafau lo la va ma lona uso ona o le tofi ulumatua ua ia faoa. O le tofi ulumatua i tu ma aga a Iutaia, o le tofi e ese ma lona taua, aua a mavae matua, ona tuu lea o le pule i le ulumatua. O le ala lea o le faoa e Iakopo o le tofi ona o lona mana'o i le pule.

I le tatou tusi faitau, faimai na iloa mamao atu e Iakopo lona uso o Esau, ona ia faia fo'i lea o le isi auala sesē, ua ia faamuamua ana ava ma a la fanau ona o lona popole ma le fefe ia Esau. Peita'i e le faapea lagona o Esau, o le uso e alofa moni ua leva na fia mafuta i lona uso. Fai mai na ia iloa atu e Esau lona uso o Iakopo, ua momo'e, fusi ma sogi atu ia te ia, ua la punonou ma fetagisi. O foliga vaaia o le loto faamagalo, o le uso e moni le alofa e naunau ia tumau mafutaga i le lelei, i le fiafia ma le fealofani.

Tamaiti manaia le faatinoga na faia e Esau, o le tagata e alofa faamaoni i le uso, e iloa ona faamagalo atu. Ia faapea fo'i i tatou ina ia fiafia e ola faamagalo ina ia maua ai e i tatou le fealofani, galulue ma fiafia faatasi.

**GALUEGA FAATINO: TAALOGA**

Saili ma lio mai upu ia i le paso. (faamagalo, fealofani, Esau, Iakopo, ulumatua, fetagisi, punonou)

S	N	M	M	P	O	I	I	J	H	G	G	D	R	T
O	X	C	Z	S	V	J	M	A	L	M	G	A	F	H
K	P	U	N	O	N	O	U	H	W	E	R	E	E	M
L	G	F	H	J	K	T	F	A	X	Z	E	S	A	U
P	A	F	E	T	A	G	I	S	I	Y	U	Z	L	G
V	Z	W	Q	M	R	G	D	E	W	Y	K	C	O	J
B	X	R	U	G	P	O	K	Y	F	B	L	X	F	L
K	L	L	H	T	S	F	I	C	V	N	N	M	A	K
D	U	Y	K	L	L	O	K	A	X	Z	N	B	N	P
V	X	C	B	O	L	I	V	H	K	V	M	Q	I	O
S	N	F	A	A	M	A	G	A	L	O	K	H	Y	I
Y	M	C	X	Z	P	L	O	G	K	H	P	L	T	R
W	R	T	Y	G	G	R	A	A	N	P	N	O	K	G

**PESE:** E mana'o Iesu i le Fealofani.

**AOAOGA:**

1. Ia loto faamagalo.
2. E sili le alofa nai lo le oa.
3. E finagalo le Atua ia fealofani lana fanau.

.....

**ASO SA:** 30 Oketopa 2022

**MATAUPU:** UA FAAMALOLO LE TAGATA PIPILI.

**SINI:** Ia malamalama le vasega o Iesu o le foma'i o foma'i, e malolo ai o tatou ma'i.

**TUSI FAITAU:** Galuega 3:1-10

**FESOASOANI MO FAIAOGA:**

O le tatou mataupu o lenei taeao ua faaautu ina e faapea “**Ua faamalolo le tagata pipili**”. O le pipili tamaiti o le tagata ua le mafai ona tu ma savali. I tu ma aga a Iutaia, o le pipili o le tagata agasala, e le mamā ma e le tataua ona nonofo faatasi ma tagata. E taotaomia ma e le amanaia e le sosaiete. Fai mai a’o savavali atu Peteru ma Ioane e agai atu i le malumalu i Ierusalemua ua igoa o le Matagofie e tatalo. Ua la iloa mamao atu le pipili o loo i luma o le faapaologa. O lana lea masanai e 42a ii aso uma, o le aisi i tagata e o atu i le malumalu. Ua oo atu Peteru ma Ioane ona aisi ifo fo’i lea o le pipili mo sina tupe mo ia. Ua fai atu Peteru ma Ioane i le pipili “Vaai mai ia te i ma’ua”. Tamaiti fai mai ua naunau mai le pipili ma lona manatu o le a maua atu se tupe mo ia. Ae ua tali atu Peteru, e leai se ario poo se auro, ae o le mea ua ia te ia e avatu, o le suafa o Iesu le Nasareta ina tula’i ia ma savali. Ua tago atu Peteru ia te ia ma faatu I luga ua malolosi ona vae. O lea ua maua e le pipili le meaalofa sili, o le meaalofa sa ia le’i mafaufauina, ae o lea ua faia e le Atua mo ia. Ua leva ona fia oo le pipili i totonu o le malumalu. Aua na o na savali lava fai mai, ua oso ma vivii i le Atua. O lagona o le tagata na saisaitia ua faasa’olotoina, o le sa le amanaiaina i le vaaiga faaletagata lea ua alaga ma vivii i le Atua. Ua iloa uma mai o ia e tagata na i totonu o le malumalu ona latou tau fai ofo ai lea.

Ioe tamaiti o le tatou tala lena mo lenei taeao. O le Atua na te tapena ma saunia meaalofa sili mo i tatou o lana fanau. O a mea tatou te mafatia ma popole ai, e le faigata i le Atua ona tali mai pe a faapea tatou te ole atu ia te Ia i le agaga faamaoni ma le faatuatua e tali mai le Atua. Ia tatou talitonu i le mana lavea’i o Iesu tatou te mafaia ai soo se mea faigata. O le savali o le tagata pipili o le faailoa lava ia te i tatou o lana fanau, le taua o le o le ola talitonu ma le faatuatua e pei ona i ai Peteru ma Ioane.

**GALUEGA FAATINO:** FAAFETAUI UPU NEI.

tagata pipili	-	ua tu o ia ma savali
Matagofie	-	segia o latou mauili
malumalu	-	o le tagata ua le mafai ona savali
meaalofa	-	Igoa o le malumalu
ua tau fai ofo	-	Falesa

**PESE:**

Jesus loves me this I know  
For the bible tells me so  
Little ones to Him belong  
They are weak, but he is strong  
Yes Jesus loves me X3  
The bible tells me so.

**AOAOGA:**

1. O Iesu o le foma'i o foma'i.
2. E mafaia e Iesu mea uma
3. E silisiliese le alofa o Iesu.

.....

**MANATU TA'IALA MO NOVEMA: O LE ATUA FAI VAVEGA**

O lo tatou maua o le ola I lea aso ma lea aso, e mafai ona faapea o vavega o le alofa tunoa o le Atua. O vavega, o galuega ofoofogia e saunia e le Atua e faailoa mai ai lona alofa I lana tagata na fai, aemaise o taimi ua leai ai se faamoemoe ona o faafitauli e tutupu.

**ASO SA: 06 Novema 2022**

**MATAUPU: UA TOE TU MAI LASALO**

**SINI:** Ia malamalama le vasega o le Atua e pule aoao i mea uma e oo lava i le ola o le tagata.

**TUSI FAITAU:** Ioane 11: 40-45

**FESOASOANI MO FAIAOGA:**

O le tele ia o vavega na faia e lo tatou Atua e faailoa mai ai lona mamalu ma lona silisiliese. O se tasi lea o vavega ofoofogia na faia e Iesu na matua ofo ai le motu o tagata sa vaavaai i ai, ina ua toe faatu mai e Iesu le tagata ua oti i le tuugamau.

Ua logo e Maria ia Iesu le tulaga ua oo i ai Lasalo lona tuagane. Ua ia fai atu, “le Alii e, pe ana e inei po ua le oti lo’u tuagane”. Tamaiti fai mai ua tiga le finagalo o Iesu, aua ua Ia silafia le le lava o le faatuatua o Maria ma lona uso. Ua oo i le tuugamau ma fetalai atu ia aveese le maa mai le gutu o le tuugamau. Ua fai ane Mareta, “Le Alii e, ua manogi o ia, aua o lona po fa lenei”. Tamaiti o le talitonuga o tagata Iutaia, e atoa loa le fa o aso e oti ai le tagata, e mautinoa lava ua manogi e leai se faamoemoe e toe ola mai. Ua tali ane Iesu, “po ua ou le fai atu ea ia te oe, “afai e te talitonu ona e iloa lea o le mamalu o le Atua”.

Ua ave ese le maa, ona tepa ae lea o fofoga o le 43ut e43 le 43ut e43 lona Tama ma faapea atu, “Lo’u Tama e, 43ut e faafetai atu ia te Oe auā ua e faafofoga mai ia te a’u”. Ua ia fetalai atu ia upu ona alaga lea ma le leo tele, “Lasalo e, ina sau ia fafo”. Ua sau o ia i fafo ua fusufusia ona mata, o lima ma ona vae. Ua fetalai atu Iesu, tatala ia te ia ma tuu atu ia te ia e alu.

Ioe tamaiti, e ese le mata’utia ma le ofoofogia o le silisiliese o le Atua, e pule aoao i mea uma lava e oo lava i lo tatou ola. O a mea tatou te popole ai, ia ole atu i le Atua e 43ut e le tatalo aua e tali mai lava o Ia i o tatou mana’o. Ia tatou talitonu ma faatuatua e leai se mea e faigata i le Atua.

**GALUEGA FAATINO: TA’ALOGA (BLIND FOLD)**

Ia saunia e e le faiaoga ieie e noanoa/fusi ai mata o tamaiti ia aua nei o latou iloa se mea. Ia fai paga ia ta’ita’i e le tamaititi e le o nonoaina mata le ua nonoa. E i le faiaoga lava le pule e fai ai le taaloga. Ae o le faamoemoe, ia talitonuina e le fanau o loo noanoa o latou mata ia latou paga o loo ta’ita’i. Ia mautinoa o loo ta’ita’i i latou i le auala sa’o ma le lelei.

E faapena i tatou i le fanau, ia tatou talitonu ma le faatuatua o loo ta’ita’i i tatou e le Atua, o a mea e tutupu e le tuulafoina i tatou e le Atua.

**PESE:** Oute pese i le mata’utia.

Oute pese i le mata’utia, i le mata’utia

I aso uma lava o lo’u olaga

E mata’utia e ofoofogia o Ia

**AOAOGA:**

1. E silisiliese le alofa o le Atua
2. E pule aoao le Atua i mea uma.

.....

**ASO SA:** 13 Novema 2022

**MATAUPU:** E SILISILIESE LE PAIA O LE ATUA

**SINI:** Ia malamalama le vasega o le Atua e paia lava  
Ia.

**TUSI FAITAU:** Esoto 3:1-6

**FESOASOANI MO FAIAOGA:**

E faatalofa i tama ma teine o le tatou vasega feololo i lenei taeao. O le tatou mataupu ua faaulutalaina e faapea E Silisiliese le Paia o le Atua. E talitonu tagata o le Feagaiga Tuai, o le Paia o le Atua, e atagia i le malosi ma lona mata'utia, e faapena i le Au-perofeta, o le latou maolimau e paia le Atua aua o ia o le Amiotonu. O aoaoga fo'i o le Tusi Paia, o le Atua alofa, o le Atua o le foafoa, o le Atua fo'i o le ola. O uiga faaalua ia o le Atua, e mafai ona tatou faamatalaina ai lona paia ma lona mamalu silisiliese.

O le tatou tala na faitauina i lenei taeao o loo faamatalaina ai le vaaiga ofoofogia na iloa e Mose i le mauga o Horepa. O se vaaiga e le masani ai le soifuaga faaletagata. O le laau talatala ua mumu ae le faaumatia. Ae o faiaga ia a le Atua o loo faamatalaina ai lona auai. O le auai o le Atua mamalu ma le paia silisiliese. O lea ua afio mai e faafesaga'i ma lana tagata na fai. O le valaau a le Atua ia Mose, o le valaau na alu ma le mana. Na taia ai Mose ma ia lagonaina ai lona faatauvaa i luma o le Atua. O le toeseina e Mose o ona seevae, o le faailoga o le avesea o lona tagata agasala, auā e le tatau ona feagai le tagata agasala ma le paia o le Atua.

Ia manatua e i tatou i le fanau le tulaga paia ma le silisiliese lea o le Atua. O le paia e mamā ma lelei atoatoa. O lona uiga, e tatau fo'i ona tatou faalatalata atu luma o le Atua ma o tatou uiga ma amio e mama e tatau ma le paia o le Atua. O a tatou feau ma galuega aemaise o lo

tatou ola aoaoina, o ina e tatau ona atagia ai lo tatou ola faapaiaina. Ia avea i tatou ma fanau e atagia ai le paia o le Atua. E ala i le avea o i tatou ma fanau e fiafia e savavali i ala o le Atua ma faia lana amiotonu.

**GALUEGA FAATINO:** TUSITUSIGA

Ia fai se tusiga solo a le vasega e faatatau i le tatou autu. O le umi o le solo, e tasi le fuaiupu ae ono laina.

**PESE:** E Paia le Atua. (Majesty)

E paia,

Le Atua na o ia

Tatou ifo, ma vivii aleluia

Silisili, Iesu o le Alii

Na maliu, ua toe tu

Mo oe ma a'u.

**AOAOGA:**

1. O le Atua o le paia lava ia.
2. E pule aoao le Atua.

.....

**ASO SA:** 20 Novema 2022

**MATAUPU:** UA SAUNI E APERAAMO LE  
TAULAGA

**SINI:** Ia malamalama le vasega e saunia e le Atua  
mea sili mo lana fanau e faatuatua ma talitonu  
ia te Ia.

**TUSI FAITAU:** Kenese 22:6-13

**FESOASOANI MO FAIAOGA:**

O le tatou mataupu o lenei taeao, o se tasi o tala manaia ma le ofoofogia o mea na saunia e le Atua mo lana fanau. O ai fo'i le tamā o le au faatuatua tamaiti? O Aperamo o le auauna e faamaoni ma faatuatua i le Atua. Ua fanau fo'i lona atalii o Isaako lea na folafola mai e le Atua. O le faatuatua o Aperamo ua tofotofoina e le Atua. O le upu tofotofu e uiga tutusa ma le upu su'esu'e poo le fia iloa pe moni le faatuatua o Aperamo ia te ia.

Ua fetala'i mai le Atua ia Aperamo, ia ave lou atalii, o lē ua pele ia te oe e fai ma taulaga. E le faigofie lea valaau pe'a fua I le vaaiga faaletagata. O Ia na foa'i mai ae o lea ua Ia toe mana'o e avatu Isaako e fai taulaga. Tamaiti fai mai e le i tali Aperamo, ae ua ia ave lona atalii ma tapena mea e osi ai le taulaga. Ua ia ave o fafie o le afi ma le polo ma faaee i lona atalii, ona o ai lea o i laua. Ao agai atu Aperamo ma lona atalii e osi le taulaga, ua fesili Isaako. *“Faauta o le afi ma le polo, ae o fea se tama'i mamoe e osi ai le taulaga mu?”*

A ua tali Aperamo, *“lo'u atalii e, e aumai lava e le Atua se tama'i mamoe mana e osi ai le taulaga”*. E ese le matagofie o le tali a le tagata faatuatua. O le tali ua atagia ai le mafanafana o le mafutaga a Aperamo ma le Atua. Ua iloa lelei e Aperamo, e saunia e lava e le Atua se tama'i mamoe e osi ai le taulaga.

Ua fai e Aperamo le fata faitaulaga ma ua faee i lona atalii i luga, ua tago atu Aperamo i le polo o le a fasi oti ia te ia. Peita'i ua faafuase'i ona valaau ifo le agelu a le Alii faapea ifo *“soia le oo lou lima i le tama, auā ua ou iloa nei ua e mata'u i le Atua. Ua e le taofia lou atalii e to'atasi ae ua e tuu mai ia te A'u”*. Ua tepa a'e Aperamo faauta o le mamoe poa ua ia aumai ma osi ai le taulaga e sui a'i lona atalii.

Ioe le fanau, e finagalo le Atua ia moni lo tatou faatuatua ia te ia. Aua o lava mea faigata e tutupu i lo tatou ola. E saunia lava e le Atua mea silisili mo i tatou. E iai fo'i taimi e tofotofoina ai tatou pe moni lo tatou

ola faatuatua. Ia tatou usita'i pea ma faalogo i le finagalo o le Atua mo i tatou uma e ala musumusuga a lona Agaga Paia.

**GALUEGA FAATINO: TUSITUSIGA**

**Ia toe faasolo sa'o mai le tala i lona faatulaga sa'o o loo i le tatou tusi faitau.**

- *le afi ma le fafie, ao fea o iai se tama'i mamoe e fai a'i le taulaga mu.*
- *Soia le oo lou lima i le tama.*
- *Ona fai atu lea o Isaako I lona tama o Aperamo, ua faapea atu.*
- *Ua na fusifusi fo'i i lona atalii o Isaako ma faaee ia te ia i le fata i luga o fafie*
- *Lo'u atalii e, e aumai e le Atua se tama'i mamoe mana e fai a'i le taulaga mu*
- *Ua ave fo'i e Aperamo le fafie e fai ai le taulaga mu, ma faaee ai ia Isaako lona atalii.*

**PESE:** Le alofa o le Atua e ofoofogia.

**AOAOGA:**

1. Ia faatuatua i le Atua
2. E faia e le Atua mea sili mo lana tagata.

.....

**ASO SA:** 27 Novema 2022

**MATAUPU:** UA VAVAO E IESU LE MATAGI

**SINI:** Ia malamalama le vasega e usita'i ma faalologo mea uma i le finagalo o Iesu.

**TUSI FAITAU:** Mareko 4:35-41

**FESOASOANI MO FAIAOGA:**

O le upu vavao, e uiga tutusa ma le upu taofi. O lona uiga e mafai fo'i ona toe faaupu la tatou autu. Ua taofi e Iesu le matagi. O le tala leni i le vavao e Iesu o le matagi, o se tasi ia o vavega na faia e Iesu, ae o le faaalua fo'i lea o lona mamalu silisiliese. Ua mavae le tele o faataoto ma vavega na faia e Iesu i Kalilaia, ona tuua ai lea e ia ma ona soo le motu o tagata, ae o atu i le isi itu. Ua latou ave o Ia i le vaa ma latou faatasi fo'i ma ia. Ua alu le faiga malaga ae ua faafuase'i ona agi mai le afa ma le matagi tele lava ua tumu ai le vaa. Ua popole ma fefefe le ausoo aua ua tauau ina faaleagaina le vaa. Peita'i o Iesu o loo tofa o ia i le taumuli o le vaa. Ua latou fafagu ia te Ia ma faapea atu, "Le Alii e, e te le manatu mai ea ia te i matou a fano?" O upu a tagata ua leai se faatuatua, o lea na molimau i le tele o vavega na faia e Iesu ae o loo tumau pea i le ola masalosalo. Ua tulai o Ia ma fetalai atu, ma vavao atu i le matagi, ua fetalai atu foi i le vai, "Faalologo ia, ina malu ia". O le valaau e i ai le pule ma le mana. Auā na ona fetalai lava o Iesu usita'i mea uma lava. Ua mate le matagi, ua matuā malu lava. Ua fetalai atu o Ia ia te i latou, "Se a le mea tou te fefefe ai? Se a le mea tou te le faatuatua mai ai?" O le fesili a Iesu o loo atagia ai, o loo i le ausoo fo'i le pule. Peita'i ua latou le faatuatua. Ua matata'u lava i latou, ma fetautulaai. Poo ai ea leni ina ua usiusitai lava le matagi ma le vai ia te ia?

Tamaiti o vavega ofoofogia lea na faia e Iesu, na Ia mafaia ona vavao i le matagi. O le faailoga o le Atua foafoa, o lē e pule i mea uma lava. O le vavao o le matagi, o se fafagu taua mo le ausoo, ina ia mautinoa e lē tuulafoaina i latou e le Atua. Ia tumau i le faatuatua, aua o a matagi ma faafitauli e tutupu ma fesouaina ai lo tatou ola. E mafai e le mana silisiliese o le Atua ona lavea'i ia te i tatou.

**GALUEGA FAATINO: TALIGA FESILI**

**Tali i le IOE poo le LEAI**

1. O le matagi e tutusa ma le upu afa.
2. Ua fefefe le ausoo ona ua saosaoa le alu o le vaa
3. O le le faatuatua o le ausoo na fafagu ai Iesu.
4. Na tula'i le ausoo ma vavao i le matagi
5. E leai se mea e faigata i le Atua.

**PESE:**

A iai Iesu i lou vaa  
Ou te ata I le afa Ha!  
Ata i le afa X2  
A iai Iesu i lou vaa  
Ou te ata i le afa  
Se i oo i lou aiga

**AOAOGA:**

1. E le tuulafoaina I tatou e le Atua
2. Tumau I le ola faatuatua
3. E lavea'i tatou e le Atua i taimi o faigata

.....

## **MANATU TA'IALA MO TESEMA: O IESU O LE TUPU**

O le Afio mai Iesu I le lalolagi, o le faailoga o le Atua ua mau faatasi ma le tagata. O le tupu o le lagi ma le lalolagi aua o ia lava na faia mea uma, ae o lea lava ua toe afio mai lava o ia e lavea'i i tatou uma.

**ASO SA:** 04 Tesema 2022

**MATAUPU:** UA FAAALI LE AGELU IA SAKARIA

**SINI:** Ia malamalama le vasega o mea uma e faailoa mai e le Atua, ia talitonu ma le faatuatua, e taunuu.

**TUSI FAITAU:** Luka 1:18-25

## **FESOASOANI MO FAIAOGA:**

Malo le soifua manuia i tama ma teine o le tatou vaesga i lenei taeao. O lea fo'i ua tatou aulia le aso Sa muamua o lenei masina. Faafetai i le alofa tausii o le Atua i lo outou soifua ma lo tatou ola, aemaise o le feagai o i tatou i le fanau ma aoaoga. O le tatou mataupu o lenei taeao, **“Ua faaali le agelu ia Sakaria”**. O le tala tatou te molimauina ai le silisiliese o le Atua ma lana pule aoao i mea uma lava. O Sakaria o le toeaina sa avea ma ositaulaga i le taimi ao tula'i mai Herota e fai ma tupu i Iutaia. O lona to'alua e igoa ia Elisapeta ua matutua i laua ma o se ulugalii sa faamaoni, e amiotonu ma savavali i ala o le Atua i aso uma. Ua matutua lenei ulugalii e leai lava sa la fanau.

Ua oo i le tasi aso, a'o feagai Sakaria ma tiute faaositaulaga, ae faafuaseia o ia i le faaali atu o le agelu ua faapea atu *“aua e te mata'u, aua ua faafogaina e le Atua lau tatalo, e fanau e lau ava o Elisapeta sou atalii, ete faaigoa ia te ia o Ioane...”* Ona tali atu lea o Sakaria i

le agelu ua faapea atu *“Pe faapefea ona ou iloa le mea nei? Aua ua ou toeaina, o la'u ava fo'i ua loomatua o ia”*. O le tali a le tagata lē talitonu. Ua ia fua le finagalo o le Atua i le vaauga faaletagata. Ua galo ia Sakaria o le Atua o loo ia auauna i ai, o le Atua e pule aoao, e leai se mea e faigata ia te Ia. O le ala lea o le ta'utino o le agelu, o ia o Kapilielu. Ua auina mai o ia e le Atua e ta'u mai lea Talalelei.

Ua fai atu le agelu ia te ia, *“Faauta fo'i e gugu oe e te e le magagana seia oo i le aso e fai ai nei mea, aua ua e le talitonu 47a ii au upu, o mea ia e taunuu lava pe'a oo i ona po..”* Ua ulufafo Sakaria mai le malumalu na osi ai le taulaga, ua genogeno ona mata ma ua gugu u le mafai ona tautala. O foliga vaaia ia o Sakaria na iloa ai e le nuu, na iloa e Sakaria se faaaliga i le malumalu.

Tamaiti o le faamaoni ia o folafolaga a le Atua. Na faatoā mafai lava ona toe tautala Sakaria ina ua fanau mai Ioane. Ua alaga Sakaria ma valaau le igoa o lona atalii o Ioane, ua iloa ai e le motu o tagata ua toe tautala Sakaria. Ioe e pule aoao le Atua i mea uma. Ia aua fo'i ne i o tatou masalosalo i lona alofa mai ia te i tatou o lana fanau. O Ia lava na te tapena ma saunia mea lelei mo lana fanau faatuatua.

## **GALUEGA FAATINO: TALIGA FESILI**

Tali mai i fesili nei

1. O le a le galuega a Sakaria
2. O le a le faaailga a le agelu ia Sakaria
3. Aisea na le talitonu ai Sakaria i le feau a le agelu
4. O ai le igoa o le agelu
5. O le se aoaoga taua na e maua 47a ii le tala?

**PESE:**

Pa'i mai nei le Alii e,  
O lou mana  
Pa'i mai le Alii e,  
O lou Agaga  
Pa'i mai nei ia ou mautinoa  
Ma saga pa'i mai faasolo atoa  
Pa'i mai ma faatumu a'u i lou oa.

**AOAOGA:**

1. E pule aoao le Atua i mea uma.
2. E faamaoni le Atua i ana folafolaga.
3. Aua le masalosalo i folafolaga a le Atua.

.....

**ASO SA: 11 Tesema 2022**

**MATAUPU: UA FANAU IESU I LE FALE O MANU**

**SINI:** Ia malamalama le vasega o le fale o manu na fanau ai Iesu o le faailoga o le Tupu ua afio mai i se ala faatauvaavaa ma le maualalo.

**TUSI FAITAU:** Luka 2:1-7

**FESOASOANI MO FAIAOGA:**

Talofa tamaiti, ua tatou iai fo'i i lenei masina e faamanatuina ai le fanau mai o lo tatou Alii Faaola o Iesu. O le vaitau fiafia mo le au faatuatua uma mo le lalolagi ona ua Afio mai le Atua i le lalolagi e

ala ia Iesu, e militino faatasi ma avea ma faaola mo tagata uma. O le tatou mataupu o lenei taeao, o le a faamatalaina ai le nofoaga na fanau ai Iesu.

Sa faia le tusiga igoa i Peteleema le aai o Tavita. Na o ifo i ai Iosefa ma Maria e tusia ai ma o la igoa. Tamaiti ao i ai Iosefa ma Maria i Peteleema ua amata ona faatiga Maria, ua lata ina fanau. Ona saili lea o se nofoaga e mapu i ai aua ua malulu le po. Ua o ane i le fale talimalo e saili se avanoa mo i laua, peita'i ua tumu ua leai se potu o avanoa. E le'i faavaivai Iosefa ae na saili pe e le o i ai lava sina avanoa mo i laua e tau lava ina la mapu atu iai. Talofa ia Iosefa ma Maria, ua toe lava o le fale o manu o loo avanoa. Peita'i na talia fiafia le fale o manu, ua lava ma totoe lea avanoa mo i laua. Tamaiti e ui a o le fale o manu e faatauvaavaa ma le amanaia e tagata, peitai'i o lea ua avea lea ma nofoaga e soifua mai Iesu lo tatou faaola.

Talofa e ia Iesu a tamaiti!. Amuia i tatou na fananau i falema'i ma fale mananaia, ae faauta ia Iesu, ua fanau mai o Ia i se fale e le fia nofo ai se tagata auā ua na o manu e tuu ai. Peita'i tamaiti e i ai le tāua na fanau mai ai Iesu i le fale o manu, ina ta'u mai ia te i tatou le tāua ona faamaualalo, o ala ia o le filemu nai lo le ola faamaualuga e fanau mai ai misa ma fevaevaeaiga.

**GALUEGA FAATINO: FAATINO LE TALA.**

Ia faatino e le fanau le tala o le Kerisimasi, ia fesoasoani fo'i lau susuga i le faiaoga ina ia malamalama le fanau i le auala na fanau mai ai Iesu.



**PESE:**

Na fanau mai i Peteleema,  
Le pepe i le fale o manu,  
Sa tu i ona luga le fetu,  
Faailoa o Iesu lea.

Osana, osana, osana fiafia  
Aua, ua fanau, mai o Iesu Keriso.

**AOAOGA:**

1. Ia maua le loto maualalo.
2. Ua liu tino tagata le Atua.
3. O Iesu o le tupu ua afio mai i se ala faatauva.

.....

*Ia Manuia tele le Kerisimasi ma le Tausaga fou*

=====